



964
1934

საქართველო

საქართველოს ეროვნულ-დემოკრატიული პარტიის
პერიოდული ორგანო.

„LA PATRIE”

Organe du parti National-Démocrate Géorgien.

№ 16

შ ი ნ ა ა რ ს ი :

- | | |
|---|--------------|
| 1. კავკასიის კონფედერაცია | ** |
| 2. კავკასიის კონფედერაციის პაქტი | ** |
| 3. ალი მარდან ბეგ ტოფჩიბაში | ალანი |
| 4. მსოფლიო ორომტრიალი და საქ. ბედისწერა. | ალ. ასათიანი |
| 5. ქართული სამხედრო სკოლა | მხედარი |
| 6. ქართული ემიგრაცია და მისი პრესა | დ. ვაჩნაძე |
| 7. მოტას სიტყვა წარმოთქმული ერთა ლიგაში. | ** |
| 8. უდიდესი ქართული თარიღი | ** |
| 9. სომეხ-ქართველთა ურთიერთობა: | ** |
| დ. ვაჩნაძის სიტყვა | |
| ა. ჯამალიანის სიტყვა | |
| ს. ფირცხალავას წერილი | |
| 10. ქართველი ერი, როგორც მშენებელი (დასას.) | გ. შურული |
| 11. ქართველები საბ. მწერ. ყრილობაზე მოსკოვში. | ქარ. მწერალი |
| 12. ქართული წარმოდგენა | ** |

პარიზი. - Paris.

1934 წ.

საქართველო

საქართველოს ეროვნულ-დემოკრატიული პარტიის
პერიოდული ორგანო.

„LA PATRIE“

Organe du parti National - Démocrate Géorgien.

ნოემბერი 1934

№ 16

NOVEMBRE 1934

კავკასიის კონფედერაცია

კავკასიის კონფედერაციის პაქტმა, რომელსაც აქვე ვათავსებთ, საყურადღებო გამოძახილი გამოიწვია ჩვენსა და ჩვენი მეზობლების გამოცემებში. ყურადღებას იქცევს ის გარემოება, რომ ამ საკითხს ყველა მიუღდა ფრიად ცალმხრივად და ზერელედ. ამ სახით აქაც აღიბეჭდა ჩვენი ემიგრანტული დაუწყობლობის ბუნება, რაც ასე თვალსაჩინოა სხვა, უფრო ყოველ-დღიურ საკითხებში.

ზოგნი ამ დოკუმენტს ზომაზედ გადაჭარბებულ მნიშვნელობას ანიჭებენ და კავკასიელ ერთა განმათავისუფლებელი ბრძოლის უდიდეს ფაქტორად ჰსახავენ; ზოგნი კიდევ მას ყოველგვარ მნიშვნელობას მოკლებულად და უარყოფით მოვლენადაც სთვლიან. საჭიროა ასეთ უკიდურესობათა თავიდან აცდენა და ამ საგანზედ თავის აზრისა და შეხედულების მოქცევა საშუალო ხაზზე, ვინაიდან სწორედ აქ მოიპოვება სიმართლე და საკითხის მიზანშეწონილი დაფასება. უდავოა, რომ ხალხთა პოლიტიკური ცხოვრების გეგმა და სისტემა ფრიად შეზღუდულია და განსაზღვრული თავის მნიშვნელობით, როდესაც იგი იქმნება საკუთარი მიწა-წყლის გარეშე, ხალხთა რეალურ ცხოვრების დაშორებით. მაგრამ ყოველი ასეთი გეგმის მიღებასა და სავალდებულოდ მიჩნევის თავისი დადებითი ფასი და ღირებულება აქვს, უკეთეს ის საღია, მიზანშეწონილი და უპასუხებს ხალხთა ცხოვრების რეალურ ინტერესებსა და ზრახვებს. კავკასიის კონფედერაციის პლატფორმა ასეთს გეგმას წარმოადგენს; იგი არ არის ამა თუ იმ პირის განყენებული აზროვნების ნაყოფი, ნაჩქარევად შეთხზული და მიღებული. მას უკვე ათი წლის ისტორია აქვს, თვით ჩვენს ამ აშლილს ემიგრანტულ სინამდვილეში. ამ ხნის მანძილზე კავკასიის კონფედერაციის პლატფორმა მუდმივი მსჯელობის და აზრთა გაცვლა-გამოცვლის საგანი იყო კავკასიის ერთა

3055



პოლიტიკურს წრეებში. ჩვენ არ გვქონია აქ მეორე საკითხი, რომელსაც ამაზნა ნკლები დავა და წინააღმდეგობა გამოეწვიოს კავკასიის ერთა სხვა და სხვა პოლიტიკურს დაჯგუფებებში. ყველა წრეებმა მიიღეს იგი, როგორც ყველაზე უფრო საიმედო გზა თავის ეროვნულ მეობის აღდგენისა და მომავალი პოლიტიკური ცხოვრების მტკიცე საფუძვლებზე დამყარებისთვის. მართალია, ზოგნი მათგანი თავიდანვე მხურვალედ მოეკიდნენ ამ საკითხს და მის პრაქტიკულად შემზადებისათვის ენერგიული მუშაობა დაიწყეს, ხოლო ზოგს კიდევ პირველ ხანებში ყოყმანი ემჩნეოდა, მაგრამ ეს, როგორც შემდეგ გამოირკვა, გამოწვეული იყო ამ წრეთა სპეციფიურ მდგომარეობითა და ანგარიშებით, რომელთა გადალახვა დროს საჭიროებდა და მოვლენათა ახალ ზედგავლენას. ასეთი გარემოება, რასაკვირველია, არ შექმნილა იმ პაქტით, რომელიც ამა წლის ივლისში გამოქვეყნდა; ის შექმნილი იყო და დამყარებული რამოდენიმე წლით უფრო ადრე, და ამ დოკუმენტის სუსტი მხარე იმაში მდგომარეობს, რომ ის ამ ფრიად მნიშვნელოვან ვითარებასაც საკმარისად ვერ ამჟღავნებს, ამ მხრივ იგი სამართლიანი კრიტიკისათვის საკმაო საფუძველს იძლევა. მაგრამ არ არის სასარგებლო, რომ ასეთი კრიტიკა მიზანშეწონილობის საზღვრებს გადასცდეს. საკმარისია აღინიშნოს მხოლოდ, რომ ასეთი დოკუმენტის გამოქვეყნებისათვის უკეთესი დროის შერჩევა შეიძლებოდა, და რაც უფრო მნიშვნელოვანია, არ იყო ძნელი, ამ დეკლარაციის ირგვლივ გაცილებით უფრო ფართე წრეების შემოკრება. ამისათვის საკმარისი იყო წინასწარი მოლაპარაკება იმ დაჯგუფებებთან, რომელნიც პაქტის გამოცემის თაოსნებთან პრაქტიკულ თანამშრომლობაში არ იმყოფებიან. ხოლო კავკასიის კონფედერაციის პლატფორმას სავსებით გარკვეულად იზიარებენ. სიძნელებს წარმოადგენს ერთი ორგანიზაციული ხელმძღვანელობის ქვეშ მოქცევა ყველა იმ დაჯგუფებების, რომელნიც იზიარებენ კონფედერაციის იდეას. ამისთვის მრავალი დაბრკოლება და წინააღმდეგობაა დასაძლევი და გადასალახავი. ხოლო ასეთს სიძნელებს არ შეიცავს საერთო დეკლარაციის მიღება ისეთს საკითხზე, რომელსაც ეს წრეები იზიარებენ და იცავენ. კონფედერაციის პაქტს უმთავრესად ასეთი დეკლარაციული დანიშნულება აქვს და, რასაკვირველია, ის დიდათ მოიგებდა, უკეთეს კავკასიის ერთა ყველა უმთავრეს დაჯგუფებათა მრწამსს გამოსახავდა. პაქტის ასეთი გაფართოვება, მართალია, გათვალისწინებული აქვთ მის ავტორებს და ეს მათს დეკლარაციაშიაც არის აღნიშნული, მაგრამ, დიდათ უმჯობესი იქნებოდა, რომ ეს წინასწარ ყოფილიყო შესრულებული.

აღნიშნავენ აგრეთვე იმ გარემოებას, რომ პაქტს ხელს აწერენ კავკასიის სამი რესპუბლიკის იმ პოლიტიკურ მიმდინარეობათა წარმომადგენელნი, რომელთა ხელში იყო ყველა ძალა და სავალება



კავკასიელ ერთა პოლიტიკურ ერთობისა და კავშირის შესაქმნელად, მათი დამოუკიდებელი არსებობის ხანაში, რაც მათ ვერ განახორციელეს, ასეთი გარემოება შესაძლოა შექმნის ისეთს შთაბეჭდილებას, თითქოს კავკასიის კონფედერაციის იდეა ამ წრით ამოიწურება; ეს რასაკვირველია, სასურველი არ არის და ამის გამოსწორება მხოლოდ იმით შეიძლება, რომ ყველა წრემ და დაჯგუფებამ გამოყოს კონფედერაციის პლატფორმის იდეა ყველა იმ საკითხებიდან, რომელთა შესახებ ამ წრეებს ჯერ კიდევ არ გამოუჩნდათ საერთო ენა და ის მიიჩნიოს, როგორც საერთო გეგმა, მიუხედავად ამ დაჯგუფებათა ორგანიზაციული წყობისა და მუშაობის წესების სხვადასხვაობისა.

ბუნებრივად ყურადღებას იქცევს ის გარემოება, რომ კავკასიის კონფედერაციის პაქტი იხსენიებს სამს რესპუბლიკას, ხოლო სომხეთის შესახებ ამბობს, რომ მისთვის თავისუფალი ადგილია დატოვებული. ვინც ამ საკითხებში საკმარისად არ არის ჩახედული, შესაძლოა ისეთი შთაბეჭდილება მიიღოს, რომ სომხური პოლიტიკური წრეები მონაწილენი ყოფილან კავკასიის კონფედერაციის პაქტის შემზადების საქმეში და უკანასკნელ მომენტში მას დაშორებულან.

ჩვენ დარწმუნებული ვართ, რომ სავესებით შესაძლებელი იყო სომხურ წრეთა დადებითი პოზიციის მიღება იმ დეკლარაციაში, რომელიც მომავლისათვის კავკასიის კონფედერატიულად მოწყობის გეგმას შეიცავს, მიუხედავად ყველა იმ სპეციფიურ პირობებისა, რომელთა მეოხებით სომხური პოლიტიკური წრეები თავს იკავებდნენ თავის მეზობლებთან, მუდმივ ორგანიულ თანამშრომლობისაგან.

ამაში ჩვენ გვარწმუნებს ის გარემოება, რომ სომხურ გამოცემებში მრავალი ახსნა-განმარტება დაწერილა იმის შესახებ, თუ რა მიზეზთა მეოხებით არ ხერხდება დღემდე სომხურ ძალთა ორგანიზაციული დაკავშირება მათი მეზობლების ძალებთან, საერთო მიზნების მიღწევისათვის წარმოებულს მუშაობაში, მაგრამ არასოდეს დაწერილა, რამ მომავალში კავკასიის კონფედერატიულად მოწყობის იდეის დამგომობი და უარყოფელი; წინააღმდეგ ამისა, არა ერთხელ ჰქონია ადგილი სომხურ პოლიტიკურ წრეთა პასუხისმგებელ წარმომადგენელთა განცხადებას, რომ ისინი სავესებით იზიარებენ ამ იდეას და გეგმას და კიდევაც მოიპოვება მათ წარმომადგენლებთან ერთად შედგენილი აქტები 1921 და 1924 წლისა, სადაც კავკასიის ერთა განმათავისუფლებელ ზრძოლის ამოცანად მიჩნეულია კავკასიის ოთხ რესპუბლიკათა პოლიტიკური და ეკონომიური ერთობის შექმნა, რაც წარმოადგენს მათი კულტურული და ეკონომიური კეთილდღეობის ერთად - ერთ საფუძველს, ხოლო მეორე დოკუმენტში ასეთს კავშირსა და ერთობას უკვე კონფედერაცია ეწოდება.

ჩვენი გამოცემა ეკუთვნის იმ მიმართულებას, რომელიც თაოსანი იყო კავკასიის ერთა განთავისუფლებისათვის მებრძოლ ძალების საქმეში და მოქმედებაში გაერთიანებისა, თვით კავკასიის მიწა-წყალზე 1921 წლის შემდეგ წარმოებულს განმათავისუფლებელს მუშაობაში, რასაც თავისი გამოსახულება მიეცა საქართველოში მომხდარ 1921, 1922 და 1924 წლის აჯანყებების დროს და აგრეთვე იმ აჯანყებებსა და ბრძოლებში, რომელსაც ადგილი ჰქონდა სომხეთში, აზერბაიჯანში და ჩრდილო-კავკასიაში. ამავე მიმართულებამ ჩაუყარა საფუძველი კავკასიურ ძალთა საერთო კავკასიურ ორგანიზაციებს უცხოეთში, ჯერ კიდევ 1924 წელს და ბუნებრივია, რომ ჩვენ მივესალმებით ყოველივე ნაბიჯს ამ მიმართულებით, მიუხედავად იმისა თუ რომელი წრიდან გამომდინარეობს ის და რა სივრცესა და სიფართოვეს შეიცავს.

კავკასიის კონფედერაციის პაქტი

აზერბაიჯანის, ჩრდილო-კავკასიის და საქართველოს ეროვნული ცენტრები,

იღებენ რა მხედველობაში, რომ ერთა ყოველმხრივი განვითარება შესაძლებელია მხოლოდ მათი სრული დამოუკიდებლობის პირობეში,

დარწმუნებულნი, რომ ამ მიზნის მიღწევა უაღრესად ძნელია გარეშე კავკასიის ყველა ძალების გაერთიანებისა საერთო საზღვრების ფარგლებში,

დარწმუნებულნი, რომ კავკასიის ერთა სასიცოცხლო ინტერესების დაცვა მოითხოვს მათი საგარეო პოლიტიკის და მათი ეროვნული თავდაცვის საერთო ხელმძღვანელობას,

დარწმუნებულნი, რომ ამგვარი კავშირით კავკასიის თითოეული ერი მოიპოვებს რეალურ გარანტიას თავისი სუვერენიტეტისა, აუცილებელის ინტელექტუალური და მატერიალური ძალების სრული განვითარებისათვის,

დარწმუნებულნი, რომ იღებენ რა კავკასიის რესპუბლიკათა კავშირის საფუძვლებს, ისინი ეყრდნობიან ყველა მათ თანამემამულეთა მხარის დაჭერას,

ერთსულოვანნი იმაში, რომ კონფედერაცია როგორც პოლიტიკური ფორმა კავკასიის სახელმწიფოთა მოცემულია ამ ქვეყნების გეოგრაფიული და ეკონომიური ერთობით,

ატყობენ შემდეგ საფუძვლებს კავკასიის კონფედერაციისა :

1. კავკასიის კონფედერაცია, უზრუნველყოფს რა შიგნით

ეროვნულ ხასიათს და სუვერენიტეტს თითოეულ რესპუბლიკისას, იმოქმედებს საგარეოთ ყველა რესპუბლიკების სახელით, როგორც საერთაშორისო ერთეული უმაღლეს წყობისა, კონფედერაციას ექნება საერთო საზღვარი პოლიტიკური და საბაჟო.

2. კონფედერაციაში შემავალი რესპუბლიკების საგარეო პოლიტიკას უხელმძღვანელებს სათანადო ორგანოები კონფედერაციისა.

3. კონფედერაციის საზღვართა დაცვა მიენდობა კონფედერაციის არმიას, შემდგარს კონფედერაციაში შემავალ არმიებისაგან, ერთ მთავარ სარდლობით, რომელიც ექვემდებარება კონფედერაციის ხელმძღვანელ ორგანოებს.

4. ყოველივე დავა, რაიცა შეიძლება ატყდეს კონფედერაციაში შემავალ რესპუბლიკათა შორის და რომლის მოგვარება პირდაპირი მოლაპარაკების საშუალებით შეუძლებელი აღმოჩნდება, უნდა გადაეცეს სავალდებულო არბიტრაჟს, ან კონფედერაციის უზენაეს სამსჯავროს. კონფედერაციაში შესული რესპუბლიკები კისრულობენ ვალდებულობას, უცვლელათ მიიღონ და აღასრულონ მათი ყველა დადგენილებანი.

5. ექსპერტთა კომისია შეიმუშავებს უახლოეს დროში კავკასიის კონსტიტუციის პროექტს ზემოთ ჩამოყალიბებულ პრინციპების სახეში მიღებით: ეს პროექტი გახდება ბაზათ თითოეულ რესპუბლიკის პირველ დამფუძნებელ კრების მუშაობისათვის.

6. ამ პაქტში დატოვებულია ადგილი სომხეთის რესპუბლიკისათვის.

აზერბაიჯანის სახელით:

ე. რახულ - ზადე,

აზერბაიჯანის ეროვნულ საბჭოს ყოფილი თავმჯდომარე და აზერბაიჯანის ეროვნულ ცენტრის თავმჯდომარე.

ალი მარდან ტოზჩიბაში,

აზერბაიჯანის რესპუბლიკის დელეგაციის თავმჯდომარე და მთავრობის ყოფილი თავმჯდომარე.

ჩრდილო - კავკასიის სახელით:

გირის სუნშ.

იბრაჰიმ ჩულიკ.

ტაუსულტან შაკმან.

საქართველოს სახელით :

ნოე უორდანია,

საქართველოს რესპუბლიკის ყოფილი
თავმჯდომარე და საქართველოს ეროვნულ
ცენტრის თავმჯდომარე.

აკაკი ჩხენკელი,

საქართველოს ყოფილი სრულუფლებიანი
მინისტრი საფრანგეთში.

დადებულია ბრიუსელში
14 ივლისს, 1934 წ.

ალი მარდან ბეგ თოფჩიბაში

8 ნოემბერს საფრანგეთის მიწას მივებარეთ ჩვენი მეზობელ ქვეყნის, აზერბაიჯანის, უდიდესი მოღვაწე ალი მარდან თოფჩიბაში განსვენებული ეკუთვნოდა წრეს ისეთ მოღვაწეობისა, რომელნიც უდიდეს კვალს სტოვებენ თავის ერის ცხოვრებაში, არა მარტო თავის ღვაწლით, არამედ აგრეთვე თავის მაღალი ზნეობრივი ბუნების მაგალითის ზედგავლენით. ასეთი მაღალი ბუნების მოღვაწეობა იშვიათად ფასდება ღირსულად მოღვაწის სიცოცხლეში. მაგრამ საკმარისია, რომ ასეთი მოღვაწე გასცილდეს ცოცხალი რიგებს, რომ მისი ნამდვილი სახე მთელი თავის სიდიდით აღიმართოს მახლობელ მეგობართა და თვით მოწინააღმდეგეთა წინაშე. გასაგებია, რომ ამ დიდი მოღვაწის მიცვალებამ უღრმესი მწუხარება გამოიწვია აზერბაიჯანის და სხვა მახლობელ და შორეულ მეზობელთა წრეებში. დასაფლავებას ბლომად დაესწრენ აზერბაიჯანელნი, ქართველები, სომხები, ჩრდილო-კავკასიელნი, უკრაინელნი, თურქესტანელნი და ყაზახები, რომელთა წარმომადგენლებმა მხურვალე გამოსალმების სიტყვები წარმოსთქვეს განსვენებულის საფლავის წინაშე.

ალი მარდან ბეგ თოფჩიბაში დაიბადა თბილისში 1862 წელს და საშუალო განათლება მიიღო იქვე, თბილისის პირველ გიმნაზიაში. მისი დიდი პაპა, ისიც ალ მარდან ბეგ თოფჩიბაში უკანასკნელ საქართველოს მეფობის დროს, ნაზირის ხარისხს ატარებდა და იყო არტილერიის უფროსი (თოფჩიბაში) და ციხის კომენდანტი. მისი პაპა, მირზა ტაფარ ბეგი მიწვეული იყო პეტერბურგის უნივერსიტეტში, როგორც აღმოსავლეთის ენების პროფესორი და მამა მისი

აგრეთვე თვალსაჩინო მხედარი იყო და მსახურებდა ვარშავაში. ასეთი თვალსაჩინო ოჯახის კვალი ღირსეულად განაგრძო განსვენებული. უნივერსიტეტის დასრულების შემდეგ იგი საოლქო სასამართლოს მდივანია თბილისში, შემდეგ გამოძიებელი. შემდეგ იგი მეთაურია აზერბაიჯანის საზოგადო მოღვაწეთა წრის. ის მოღვაწეობს კულტურულ და სხვა ეროვნულ საქმიანობის ყოველს დარგში. ის შემქნელია და ხელმძღვანელი აზერბაიჯანის ფართე პატრიოტულ მოძრაობისა, როგორც ცნობილი გაზეთის, „კასპი“-ს რედაქტორი, რუსეთის პირველი სახელმწიფო სათათბიროს წევრი და აზერბაიჯანის წარმომადგენელი მუსულმანთა კონგრესებზე და სხვა საზოგადოებრივი ხასიათის ყრილობებზე. აზერბაიჯანის დამოუკიდებლობის ხანაში იგი პარლამენტის თავმჯდომარეა და შემდეგ უცხოეთში გაგზავნილ დელეგაციის თავმჯდომარე.

ალი მარდან ბეგ თოფჩიბაშის მოღვაწეობა და მთელი მისი პირადი ცხოვრება მტკიცეთ იყო დაკავშირებული და გადამბული საქართველოსთან და მისი საუკეთესო შვილთა საქმიანობასთან. თავის ერში იგი მიჩნეული იყო, როგორც ქართველი ერის ერთგული მეგობარი და მისი ინტერესების მცოდნე და დამცველი, და ასევე საქართველოში იგი ცნობილი იყო როგორც ქართველების გულწრფელი მეგობარი და საუკეთესო წარმომადგენელი ჩვენი მეზობელ ერის. ალი მარდან ბეგი ცოცხალი კავშირი იყო ამ ორ მეზობელ ერთა შორის ათეულ წელთა მანძილზე და მთელი მისი მოღვაწეობა მუდამ ემსახურებოდა საქართველოსთან და სხვა კავკასიის ერებთან მტკიცე კავშირისა და ერთობის დამყარების საქმეს.

ასეთი მოღვაწეობა მან დაიწყო დიდ ილიასა და მის სახელოვან წრესთან. მრავალი პატრიოტული საქმე გამოუწყია და მრავალი გეგმა და აზრი დაუმუშავებია განსვენებულს ამათ წრეში და ასეთი მოღვაწეობა მან ქართველების შემდეგ თაობებში განაგრძო და თავის ცხოვრების უკანასკნელ წუთამდე მიიტანა. ჩვენი მეზობელი ერის ამ დიდი მოღვაწის ცხოვრება ისე მჭიდროთ არის გადამბული ჩვენი ერის მეთაურწრეთა მოღვაწეობასთან მთელი ორმოცი წლის მანძილზე, რომ ჩვენი მატთანე ღირსულ ადგილს დაუთმობს მას, როგორც დიდს ჩვენს მეგობარს და საქართველოს ყოველ ჭირ-ვარამის მოზიარესა და მონაწილეს.

ალანი.

მსოფლიო ოკრომბრიალი და საქართველოს ბედისწერა

მიმდინარე წლის საქტემბერი ფრიად მნიშვნელოვან დატას წა-
რომადგენს ჩვენი ერის განთავისუფლებისათვის წარმოებულ ბრძო-
ლის მატრიანეში. მაგრამ იგივე თვე საყურადღებო თარიღია სხვა დიდ
და პატარა სახელმწიფოთა თანამედროვე პოლიტიკურს ვითარებაში.
საბჭოთა რუსეთი, რომელიც თავის გაჩენის დღიდან, დაუპირდაპირდა
ყველა ერებსა და მთელს მსოფლიოს და იბრძოდა და მუშაობდა მათ
დასანგრევად ყოველი ზომითა და საშვალებით, ყოველს სფეროში
და ყოველს ასპარეზზე, მოწვეულ იქმნა იმ კრებულში, რომელსაც
ნაციათა ლიგა ეწოდება და რომელიც დაარსებულია დასამკვიდრე-
ბლად ხალხთა შორის ურთიერთობისა, მშვიდობიანობისა და კანო-
ნიერების მორალზე. საბჭოთა რუსეთს არ გამოუცვლია თავისი კო-
მუნისტური იდეა და მორალი, რომელიც დიამეტრალურად ეწინა-
აღმდეგება „ბურჟუაზიულ“ ქვეყნების აზრსა და მორალს; ლიტ-
ვინოვმა ეს ხაზგასმით განუცხადა ენენეს პატივცემულს კრებულს.
თავის მხრივ არც ამ უკანასკნელს გადაუგდია თავისი აზრები და დე-
ბულებანი, ნაციათა ლიგის საძირკვლად ჩაყრილი. ასე რომ ორთავე
მხარემ ახდლად და სრულის ნებაყოფლობით გაუწოდა ხელი ერთი
მეორეს. როგორც ბურჟუაზიული, ისე კომუნისტური ნამუსი შენა-
ხულია და კაპიტალიც შეძენილი.

მაგრამ ამ დაქორწინების ამბავი ასეთია მხოლოდ გარეგნულად,
ხოლო მისი არსებითი ბუნება და შინაარსი ასეთ უმანკო სახეობისა-
გან დიდათ განსხვავდება. კაპიტალი უთუოდ შეძენილ იქმნა, შესა-
ძლოა ორივე მხარის მიერ, თანაბრად თუ ზედმეტად, მაგრამ ნამუსი
და უმანკოება, რასაკვირველია, არ დარჩენილა შეუბღალავი არც
ბურჟუაზიული და არც კომუნისტური. საჭირო იყო, რომ წითელ სა-
სიძოს ბურჟუაზიული მოქცევა და მოქნილობა შეეთვისებია, ფრაკით
შემოსილიყო, ლენინსავით ხუთსართულიანი გინება დაეტოვებინა
და ტალეირანის შემპარავ, ტკბილი ენით ამეტყველებულიყო და მია-
ორიგინალურ კავალრად გამხდარიყო. წინეთ ეს არ ხერხდებოდა, მა-
გრამ ამ ხანად შესაძლებელი გახდა. ჰფიქრობენ, რომ ამის უმთავ-
რესი მიზეზი ის არის, რომ მოსკოველი სიძე ძლიერს მოყვრებს დაე-
ძებს, მოსალოდნელ ომით დაშინებული. ამასთანავე ის უთუოდ მდი-
დარ მზითვებსაც უთვალთვალებს ქონებრივად დაქცეულ და გაღა-
ტაკებულ ოჯახის გასამაგრებლად. მაგრამ ყოველივე ეს საკმარისი
არ იქნებოდა, რომ თვით მშვენიერ ბურჟუაზიულ პატარძალსაც არ
გამოსცვლოდა თავისი ძველი აზრი და ბუნება. დღეს არც ის უყუ-
რებს „მარიაეს“ წინანდებულად, როგორც წმინდა და სამუდამო კონ-
ტრაქტს ღვთისა და ქვეყნის წინაშე. რასაკვირველია, მას არც „ზა-
ქსი“ მოსწონს, კავშირი და პირობა ერთი დღით, მაგრამ არც ისე, რო-

გორც წინეთ, სამუდამო უღელი და ბორკილი... ასე რომ, ენევის „მარიაჟი“, შესაძლოა ისე მტკიცე არ გამოდგეს, როგორც ამას ზოგიერთი ჰფიქრობს, მაგრამ ის უთუოდ არც ისე შემთხვევითი იყო და არაბუნებრივი, როგორც ეს ბევრს ეჩვენება. კომუნისტური რუსეთისა და დანარჩენი სამყაროს დაპირდაპირება და განსხვავება კვლავ რჩება მრავალს სფეროში, მაგრამ ვინც ამ ორი მხარის ეხლანდელ ბუნებას ღრმად ჩაუკვირდება, უთუოდ შეამჩნევს, რომ ეს ორი მხარე ერთმანეთს უახლოვდება. ზოგი ჰფიქრობს, რომ მოსკოვის კომუნიზმმა განიცადა დიდი ცვლილება, ევოლიუცია და მით დაუახლოვდა სხვა ქვეყნებს. ეს უთუოდ ასეა და ისტორიას არც ახსოვს მაგალითი, რომ ხალხთა ცხოვრება ვინმეს ხანგრძლივად დაემორჩილებინოს განყენებულ და უცვლელ დოგმებისათვის. მაგრამ ეს ცვლილება უფრო გარეგნულია, ვიდრე შინაარსით. სახელმწიფოებთან პირობისა და ტრაქტატების სიწმინდე და ხელშეუხლებლობა, რომელიც მათ წინეთ სასაცილოდაც არ ყოფნიდათ, დღეს ასეთად არის აღიარებული და რად არ უნდა იყოს ის ასე მიჩნეული, თუ ეს პირობა მათ სარგებლობას მისცემს იმ დრომდე, სანამ მათი დარღვევა არ გახდება მათთვის უფრო სასარგებლო? ასევეა ვალების ცნობა, როდესაც ეს მათ ახალი სესხების გზებს უხსნის, რაც მათ გადახდის აუცილებლობას სრულებით არ მოასწავებს... და ასევე მრავალს სხვა დარგში.

გაცილებით უფრო მნიშვნელოვანი და ღრმა ევოლიუცია განიცადა მეორე სამყარომ და თუ რუსეთის კომუნიზმმა გადადგა ერთი ნაბიჯი მის მიმართ, ამან მრავალი ნაბიჯით უბასუხა. საერთო აზრია, რომ კომუნიზმი დამარცხდა ყველა სხვა ქვეყნებში, გარდა რუსეთისა. მსოფლიო რევოლიუციის შესახებ იმედიანად ეხლა თვით მოსკოვიდანაც აღარაფერს ამბობენ. მესამე ინტერნაციონალის მუშაობა მოკსოვიდან ფრიად შენედა; მაგრამ თუ ეს მსოფლიო რევოლიუცია არ მოხდა და არ მოხდება, სამაგიეროდ მოხდა დიდი ევოლიუცია მთელი მსოფლიოს გასწვრივ, რომელმაც დაამყარა მთელ მსოფლიოში ბევრი რამ ისეთი, რაც ამ მსოფლიო რევოლიუციის გეგმაში შედიოდა. ამ გარემოებას ნაკლებად თუ ვინმე აქცევს ყურადღებას და ის კი უთუოდ ყურადღების ღირსია. ყველანი ვხედავთ, რომ რუსეთის განუზომელ სიერცხვზე აშლილი კომუნისტური ტალღები თექვსმეტი წლის მანძილზე ეხეთქება დანარჩენ მსოფლიოს კიდევებს და ვერ შეანგრია მისი ზღუდეები. მაგრამ საკმარისია შევადაროდ ეს დღევანდელი ხალხთა ცხოვრება იმას, რაც იყო ამ ოციოდე წლის წინეთ, რომ დავრწმუნდეთ, რომ მრავალია შეცვლილი და შერყეული ამ დაუნგრევლ ზღუდეთა შორის; ერთა დამოკიდებულობის წესი და ზნე, პირობისა და ვალდებულების ძალა, ხალხთა შინაური წყობა და ვითარება, ნდობა, კრედიტი პიროვნული და სახელმწიფოებრივი; პიროვნული, ოჯახური და სახელმწიფოებრივი ზნე და წესი იმდენათ არის შერყეული და შეცვლილი, რომ ის წარმოადგენს ნა-

მდვილს რევოლიუციას, რომლის მსგავსი სივრცითა და შინაარსით, კაცობრიობას არასოდეს განუცდია ასე მოკლე დროის მანძილზე. კაპიტალისტური სამყარო კმაყოფილია და დამშვიდებული იმით, რომ გარეგნულად მასში ყოველივე ისეა, როგორც იყო წინეთ. კანონი, ადმინისტრაცია, ვაჭრობა და მრეწველობა, ქარხნები და წარმოებანი, გზა და მისვლა-მოსვლა, ყოველივე თავის რიგზეა, თუმცა შესუსტებული ეკონომიური კრიზისის გამო, რომელსაც სწამლობენ სხვა და სხვა ეკონომიური რეფორმებით, რომელნიც ვერავითარ გაუმჯობესობას ვერ ჰქმნიან. პოლიტიკური და ეკონომიური კრიზისების ასეთი მოვლენანი წარსულშიაც მრავალჯერ უხალავს კაცობრიობას და მათ დასაძლევად მრავალი ნაცადი წამალი გამოუჩნახავს. დღეს აღარ მოქმედობს ასეთი წამლობა და ხშირად კიდევ უფრო ამძლავრებს ცხოვრების დაავადებას. დროა ნათელი გახდეს ყველასათვის, რომ ხალხთა ცხოვრების სნეულებათა მკურნალობა შემცდარი გზით მიდის და წამალი და მალამო სნეულობის წყაროს ვერ სწვდება, არამედ მხოლოდ მის შედეგს, მის ანარეკლს, მის გარეგნულ გამოსახულებას.

* * *

ხალხთა ცხოვრების თანამედროვე კრიზისთა და სნეულებათა ფენები რომ მათ მორალურს სფეროში მოიპოვება, ეს საკმაოდ თვალსაჩინო უნდა იყოს ყველასათვის. ვინც ამ მოვლენების ბუნებას ღრმად ჩასწვდება. წინეთ პიროვნების უბრალო სიტყვიერ დაპირებასაც ფასი ჰქონდა, ხოლო წერილობით პირობას, იშვიათად სჭირდებოდა სახელმწიფოებრივი ძალით დაცვა და განაღდება. კერძო კრედიტი საფუძველი იყო ყოველივე წარმოებისა და ვაჭრობა-მრეწველობის, ხოლო სახელმწიფოსადმი ნდობა კიდევ სახელმწიფო ფინანსების. დღეს ეს იმ ზომიდაა შერყეული, რომ ზოგიერთ ქვეყნების ბანკებში ათეული მილიარდები ძვეს უმოძრაოდ, რადგან მის სესხაც გაცემას ვერ ჰბედავენ ძველებურს პირობებში. სახელმწიფოთა მიერ გარეშე სესხის აღება ხომ თანდათან დავიწყებას ეძლევა, რადგან უმდიდრეს სახელმწიფოსაც აღარ მოეპოვებათ ეს ძველი ნდობა და კრედიტი. კიდევ უფრო უარესი მდგომარეობა დამყარდა ხალხთა შორის პოლიტიკურ დამოკიდებულობაში. საერთაშორისო უფლება წინეთაც მხოლოდ სახელით იყო უფლება და არა არსებითად, რადგან მისი ნორმები მოკლებული იყო ძალდატანებითი განაღდების საშვალებას, რაც ყველა უფლებრივ ნორმებს ახასიათებს. მაგრამ წინეთ საერთაშორისო ხასიათის კონტრაქტს და პირობას სიმტკიცეს აძლევდა და სავალდებულოდ ხდიდა ხალხთა და მათ მეთაურთა მტკიცე მორალური შეგნება. დიდი რამ გარდატეხა, რევოლიუცია თუ გამოიწვევდა ასეთ პირობის დარღვევასა თუ მისგან გადახვევას. ეხლა ეს

მეტად გაადვილდა. საკმაოა მთავრობის შეცვლა, ანუ მხოლოდ საგარეო მინისტრისა და ხშირად კიდევ უბრალო განცხადება, რომ ახალი პირობები შეუძლებლად ხდიან სახელმწიფოს მიერ აღებულ ვალდებულებათა შესრულებას... ასე რომ, როდესაც ენევეაში წამდგარ ბოლშევიკებს, მასპინძლები რეკომენდაციას უკეთებდნენ—ენევი მიღებულ ვალდებულებას ასრულებენ, საერთაშორისო ზავს ემსახურებიანო, ამაში ბევრი რამ არ ყოფილა გადაჭარბებული. ისევე, როგორც ბევრი ჩვენგანის, შეეძლო დაემბათ ენევის კრებულის წევრებს.

რუსეთის ნაციათა ლიგაში მოპატივებას, საფრანგეთის წარმომადგენელნი და სხვებიც, იმით ასაბუთებდნენ, რომ ეს დიდათ დააზიანებდა გერმანიის აგრესიულ გეგმებს. თუ რუსეთი ჩვენ არ დავიხლოვეთ, გერმანია დაუკავშირდება მასო. თუ ასეთი აქტი ვინმეს ააცდენდა ეროვნულ საფრთხეს, რასაკვირველია ასეთ გადაწყვეტილებას წუნს ვერავინ დასდებდა; მაგრამ არავის განუშარტავს, თუ როგორ დაუკეტავდა რუსეთს გერმანიასთან დაახლოვების ზვას ნაციათა ლიგაში გამოქიმივა. ერთი თვეც არ გასულა მას შემდეგ, და უკვე მთელი მსოფლიო პრესა ალაპარაკდა—გერმანელები ვაფაციცებით მხოლოდ ასეთი გამრავლების უნარით არ განისაზღვრება. დე კირიმუშობენ რუსეთთან დახლოვებისათვისო. არავისაც არ მოსდის აზრად, რომ რუსეთის ენევეაში მოკალათება შეუძლებლად გახდის ასეთი გეგმების შესრულებას. ბევრს კიდევ იაპონიის ექსპანსია აზინებდა, და ამის მალამოდ რუსეთის ევროპასთან დაახლოვებას რაცხდნენ. არავინ ჰფიქრობს იმაზედ, რომ თუ დღეს რუსეთს აზინებს იაპონიასთან ომი, სრულიად არ არის შეუძლებელი, რომ ხვალ მას ზოგი რამ კიდევ დაუთმოს და დაუახლოვდეს, რომ დრო მოიგოს, და ამ ხნის განმავლობაში, ეს დანაკლისი სხვაგან აინაზღაუროს.

ათი წლის წინეთ უთუოდ შეუძლებელი გახდებოდა ამ საკითხის ასე იოლად გადაჭრა, ასეთი ფორმითა და ასეთი საბუთებით. მოტას სიტყვები შეიჭრა დისონანსად; მან მოაგონა ლიგას ის მოენევის საზეიმო სიტყვებშია ხოლოდ შევიცარიის წარმომადგენლის რალური საფუძვლები, რომელზედაც არის აგებული ენევის დაწებუნება. „ნაპორტიუნისში, თუნდაც ამალღებული და კანონიერი ჩვენთვის ხშირად მიუღებელია, ჩვენ თუ რაიმე მეტოქეობას უწევთ სხვა სახელმწიფოებს ეს მხოლოდ მორალურ დიდების სიმტკიცის ძიებაშიო, განაცხადა მან. მოტამ მოაგონა ლიგას აგრეთვე ის ვალდებულებანი, რომელიც ორჯერ ჰქონდა მიღებული მას თავის-თავზე საქართველოს მიშართ. ენევის კრებულმა ოვაციები გაუშართა მოტას. მისი სიტყვა თითქმის ყველას მოეწონა. რამოდენიმე წლის წინეთ უთუოდ ყველანი ასეთი ენით ილაპარაკებდნენ. უმალღესი მორალი, მთვალეობა და მიღებული ვალდებულება, კაცობრიობის სინიდისი



და სხვა ამალღებული ზნე და წესი დიახაც მიჩნეული ჰქონდათ მათ ნაციონალური ლიგის საფუძვლად, მაგრამ დღეს მას ჰფარავს ანგარიში და ისიც მეტად ბუნდოვანი ანგარიში... მოტას სიტყვა სიამოვნებით იქმნა მოსმენილი, ხოლო საქმე ამ მოკლე ანგარიშით გადაწყდა.

უთუოდ ასეთი არ იქნებოდა დასავლეთის სახელმწიფოთა პოზიცია კერძოთ ამ საგანზე, და მრავალ სხვა საკითხში რუსეთის მიმართ, რომ მათი პოლიტიკური ანგარიშები უფრო ფართე და გრძელ მანძილიან გეგმებზე იყოს აგებული. საბჭოთა რუსეთის საფრთხე როგორც მსოფლიო რევოლუციის წყაროსი, ვთქვათ, მათ უკვე აღარ აზინებს; ისინი ჰფიქრობენ, რომ საბოლოოდ აიცილინეს თავიდან ასეთი საშიშროება და ნაკლებად აქცევენ ყურადღებას იმ გარემოებას, რომ თუმცა მსოფლიო რევოლუცია არ მომხდარა, მაგრამ მოსკოვის კომუნისტებმა მინც შესძლეს საკმაოდ დიდი რაოდენობის რევოლუციონური ბაცილების შემზაპუნება ყველა ხალხთა ძარღვებში; ამ ხანად ეს მხოლოდ ერთგვარ უძღურებას და დაძაბუნებას იწვევს ხალხთა მორალურსა და ეკონომიურს ცხოვრებაში, მაგრამ არავინ იცის თუ რა სახეს მიიღებს ის შემდეგ, უკეთეს ეს ბაცილები დროზედ არ იქნა დაძლეული. მაგრამ თვით რუსეთი, არა კომუნისტური მხოლოდ, არამედ საზოგადოთ რუსეთი, შეიძლება თუ არა რომ ის გახდეს დიდ საფრთხეთ დასავლეთისათვის?

ამ რამოდენიმე თვის წინეთ იტალიის მეთაურმა მუსოლინიმა დასტამბა წერილი, რომელმაც დიდი გამოძახილი გამოიწვია პრესაში და თვით მეცნიერულს გამოცემებში. მუსოლინი აღნიშნავდა იმ საშინელს საფრთხეს, რომელიც მოელის დასავლეთის იმის გამო, რომ მისი მოსახლეობა დაკლების პროცესში შედის, ნაცვლად მომატებისა. ამავე დროს რუსეთი და აზიის ქვეყნები მეტად მრავლდებიან. ინგლისელი მეცნიერი საუნდერსი ამას დასძენს, რომ „აზლოა საათი, როდესაც „ყვითელი საფრთხე“ რეალური გახდება“—ო. რომ ეს საფრთხე შეიძლება მარტო ყვითელი არ იყოს, არამედ თეთრიც ანუ ყვითელ-თეთრი, ამას გვიმტკიცებს ნიჭიერი ფრანგი ყურნალისტი დე კირილისი, რომელმაც რუსეთში იმოგზაურა და მისი ცხოვრება ნათლად აგვიწერა. დე კირილისი ჰფიქრობს, რომ 50 წლის შემდეგ რუსეთს ეყოლება 250 მილიონი მცხოვრები, ხოლო საფრანგეთს—35 და გერმანიას—55. მაგრამ რუსეთის საფრთხე, მთელი ევროპისათვის მხოლოდ მისი ასეთი გამრავლებით არ განისაზღვრება. დე კირილისი გვარწმუნებს, რომ რუსეთი როგორც ძველი, ისე ეხლანდელი, მუდამ მსოფლიოს შთანთქვაზე ოცნებობს. ამ ხალხის ეს სიმუსუნავე არასოდეს დაკმაყოფილებულა. ეს ხალხი, რომლის ტერიტორია მთელი მსოფლიოს მეექვსედ ნაწილს შეიცავს და აერთებს წყნარ ოკეანეს ბალტიის ზღვასთან, აზიის ევროპასთან, რომელიც საზღვრავს 50 ქვეყანას და შთანთქავს ასეულ სხვას, თავის ზრახვებს არასოდეს იმჩნევდა დაკმაყოფილებულად. ხან შორეულ-აღმოსავლეთისაკენ

იწვედა, ხან სპარსეთისაკენ, ხან შვეციისაკენ, რომ მიეღწია ატლანტიურ ოკიანემდე, მუდამ სტამბოლს მოითხოვდა, მუდამ სამხრეთის სლავიანებს შთანქვით ემუქრებოდა, რუსეთი არასოდეს ყოფილა გამძღარი და არც არასოდეს იქნება გამძღარიო.

დე კირილისის ასეთი რეკომენდაცია რუსეთისა, რასაკვირველია ნაკლებად ჰგავს იმ კანონიერებისა და პაციფიზმის განსახიერებას და აბრამის ბატკანს, რომელიც ევროპის ქვეყნების წარმომადგენლებმა ენეევაში ერთმანეთს წარუდგინეს ამა წლის სექტემბერში, და დე კირილისის დახასიათება, რომ სავსებით სწორია, ამის უდავო საბუთია რუსეთის მთელი წარსული. და თუ ეს ასეა, მაშინ რა კეთილი შედეგები უნდა მოჰყვეს ევროპისათვის ისეთს პოლიტიკას, როდესაც ხან ერთი სახელმწიფო გადაეხვევა რუსეთს, ხელს შეუწყობს და შეუმსუბუქებს მდგომარეობას, ხან მეორე პირველის ჯინაზედ და ხან კიდევ მრავალნი ერთად; ხოლო ყველანი ერთად სდარაჯობენ ყველა მათ საზღვრებს, რომ ხიფათი რამ არ შემთხვევს, მოულოდნელად თავს არავინ დაესხას და არ წაართვას თუნდაც ერთი მეასედი იმისა. რაც მას წინეთ სხვებისათვის წაუერთმეგვია. ეს პოლიტიკა ის პოლიტიკაა, რომელმაც დაუკლებლივ უნდა გაანადღოს დე კირილისის მწარე წინასწარმეტყველობა—რომ მსოფლიოს მეექვსედ და უმდიდრეს სივრცეზე, რუსეთის მოსახლეობა ბაჭიებსავით გამრავლდეს და 50 წ. შემდეგ 250 მილ. გახდეს. ამ შემთხვევაში თითქოს ერთადერთი პოლიტიკური გეგმა უნდა ყოფილიყო საღი და რეალური რუსეთის მიმართ და გეგმა მთელი დასავლეთისათვის სასარგებლო და მისაღები: არა იმის ხელშეწყობა, რომ რუსეთი გახდეს 250 მილიონი, არამედ იმისა, რომ ისიც ჩაყენებულ იქნეს გამრავლების მხრივ, დაახლოვებით ისეთსავე პირობებში, რომელშიდაც იმყოფებიან დასავლეთის სხვა ქვეყნები. რუსეთი რომ ველიკოროსიის საზღვრებში მოემწყვედეს და მას ჩამოეცალოს სხვა ეროვნებათა სივრცე-სიმიდდრენი, მისი მოსახლეობის გამრავლებაც ისეთივე იქნება დაახლოვებით, როგორც სხვების. მაგრამ არა მარტო ასეთ გამრავლებაში გამოისახება მხოლოდ თანამედროვე რუსეთის სივრცეში მოქცეულ უკრაინის, ბელოროსიის, კავკასიის, ყაზახთა ქვეყნების, თურქესტანის, კირგიზისა და სხ. და სხ. შთანთქმის საშიშროება. რუსეთის ისტორია გვასწავლის, რომ დაქსაქსული და დანაწილებული, სახელმწიფოებრივად მოუწყობელი რუსობა, სახელმწიფოებრივად შენდება მას შემდეგ, რაც მან მონგოლთა ორ. საუკუნოვანი ბატონობა განიცადა და მათგან შეითვისა სახელმწიფოებრივი ადმინისტრაციისა და ფინანსების მოწყობის წესები. შემდეგ მას გერმანელი, ლიტოველებისა და სხ. ერთა წარმომადგენელნი აწყობდენ და ალაგებდენ. შემდეგ ამით ქართველები, სომხები და სხვა ერთა წარმომადგენელნი მიემატენ. ამ ელემენტებმა შეჰმატეს და შესძინეს რუსეთის ხალხს ის სახელმწიფოებრივი მართვის თვისებები, რომელიც მას აკლდა.

ძნელი არ უნდა იყოს რუსეთის წარსულისა და აწმყოს მიხედვით, წინასწარ გათვალისწინება იმისა, თუ რა შედეგი უნდა მოჰყვეს შესრულებას იმ გეგმისა, რომლისთვისაც ასე იღწვიან ზოგიერთი დასავლეთის ქვეყნები—უკეთეს რუსეთი შერჩა ეხლანდელ თავის საზღვრებს, კომუნისტური რეჟიმით გამოწვეული დაუძლურება მოინელა და გადაიტანა, მის საზღვრებში მყოფი ერები შთანთქა და შეიზარდა და მათი თვისებებით თვისი რასიული ნაკლი შეავსო. თუ დღევანდელმა რუსეთმა, მსოფლიო ომით, და კომუნისტური რევოლუციითა და რეჟიმით დაუძლურებულმა, უნიადაგო, განყენებული ინტერნაციონალური იდეებით შეპყრობილმა, საგრძნობლივ შეარყია და დამბლა დასცა დასავლეთის ხალხთა ცხოვრებას როგორი იქნება ამ დასავლეთის მდგომარეობა, უკეთეს 50 წლის შემდეგ მას მოევიწინება შეკრული და შედუღებული 250 მილიონიანი რუსეთი, ახალი ნაციონალური ზრახვებით შეწყობილი და ამოძრავებული? ასეთ ძალაზე და ასეთს პირობებში მეორე ჯულაშვილის წარმოშობა უთუოდ გაცილებით მეტი საფრთხე იქნება დასავლეთისათვის, ვიდრე იყო და არის ამ ხანად პირველი ჯულაშვილის მოღვაწეობა. და ასეთ საფრთხის წინაშე რას უნდა წარმოადგენდეს ყველა ის უთანხმოებანი, რომელიც მოეპოვებათ ევროპის ქვეყნებს ერთმანეთის შორის და რომელთა მეოხებით ისინი არამც თუ ვერ ახერხებენ საერთო გეგმით და საერთო ძალებით მოქმედებას, მომავალი საერთო და დიდი საფრთხის თავიდან ასაცდენათ, არამედ, წინააღმდეგ ამისა, ხელს უწყობენ ამ საფრთხის მოახლოებისათვის საუკეთესო პირობების შექმნას?

* * *

დასავლეთი რომ დიდი განსაცდელის წინაშე იმყოფება, ამაზედ ხშირად მეტყველობენ მუსოლინი და სხვებიც. მსოფლიო ომის მძიმე მემკვიდრეობას, კომუნისტური მოძრაობის მოვლენაც დაემატა. ეს კომუნისტური რუსეთი უზარმაზარ ანთებულ კოკონს წარმოადგენს დასავლეთისა და აღმოსავლეთის სამყაროთა შორის და უკვე ჩვიდმეტი წელია რაც განუწყვეტლივ ისერის ცეცხლის ალს ყოველის მიმართულებით. ზოგან მან რევოლუციური მოძრაობის გაღვივება შესძლო, ბევრი რამ გადაწვა და გაანადგურა. სხვაგან მან ეს ვერ მოახერხა, მაგრამ უხილავი გზებით მაინც შეიჭრა, ხალხთა სულიერ ცხოვრებას, ეკონომიურ და პოლიტიკურ წყობას, საფუძვლები შეურყია, დაუზიანა. იგი ფხიზლად დარაჯობს დასავლეთს და აღმოსავლეთს, რომ უფრო მოხერხებული დრო იშოვოს ახალი იერიშებისათვის. აქამომდე ინტერნაციონალური დროშით ილაშქრებდა, ამიერიდან ნაციონალური დროშით დაემუქრება, თუ ეს უფრო მკრელად მოეჩვენა. ამისთვის ის ხალხს ამზადებს, სამშობლოსა და

მამულის სიყვარულს ათვისებს; რუსეთის იქით კიდევ დიდი სამყაროა საუკუნეთა მანძილზე დასავლეთთან დაპირდაპირებული. აღმოსავლეთის ქვეყნები თავს აღწევენ საუკუნოებრივ ძილსა და თვლემას და ალორძინების პროცესს განიცდიან. ამათ მრავალი ანგარიშები აქვთ დასავლეთის ქვეყნებთან... დასავლეთის წინაშე უმძიმესი პრობლემები დგება გადასაჭრელად და ეს მოითხოვს მისგან თავის შერყეულ მორალური, პოლიტიკური ცხოვრების დაჩქარებით აღდგენას, განმტკიცებასა და გაძლიერებას, რომ შინაგან და გარეშე საფრთხეს სათანადო პასუხი გასცეს.

დასავლეთის ხალხთა ცხოვრების ეგზომ მძიმე საშინაო და საგარეო სირთულენი ბევრში სრულს უიმედობას ჰბადებს. ხოლო სხვებს კიდევ სწამს, რომ ევროპა თავს დააღწევს ამ მძიმე დებრესიას და კვლავ აღსდგება, ალორძინდება. ბევრს ამისიმედს იტალიის მაგალითი უღვიძებს. ამ ქვეყანამ სხვებზე ადრე განიცადა თავის ცხოვრების მძიმე აშლილობა მსოფლიო ომისა და კომუნისტური მოძრაობის გავლენით, მაგრამ მალე შესძლო ამ პროცესის შეჩერება და ამის მერე ამაღლებისა და გაძლიერების გზით მიდის. თავიდან თუ ყველანი აღმაცერად უცქეროდენ იტალიის მიერ აღებულ ახალ გეზს, შემდეგ ბევრმა მისი მიბაძვა დაიწყო, ხოლო ამ ხანად მას ძველებურად აღარავინ სჯის. „ტანი“, უდიდესი გაზეთი და ოფიციალური საფრანგეთისა, რომელიც ჯერ ხნობითდასავლეთის ყველა სხვა ქვეყნებზე უფრო დაშორებულია ფაშისტური იტალიის ახალ გეზს, ფაშისტური წყობის მეთორმეტე წლის თავზე სრულის სისწორით და მიუდგომლობით აღნიშნავს იმ უდიდეს მიღწევებს, რომელნიც შესძინა იტალიის მუსოლინის 12 წლის მოღვაწეობამ. უდავო სინამდვილე ამარცხებს განყენებულ და ბუნდოვან საბუთებს; რომელნიც ასე ბლომად გროვდებოდა ფაშიზმის წინააღმდეგ. სახელმწიფოებრივ ნიადაგზე მდგომი მიმართულებანი თან და თან ითვისებენ იმ აზრს, რომ სახელმწიფოს ავტორიტეტის ამაღლება, მტკიცე მმართველობა და საქვეყნო ინტერესებისათვის პიროვნულ და კლასიურ ეგოიზმის ალაგმვა სახელმწიფოებრივი ძალითა და ზეგავლენით, რაც შეადგენს იტალიური ფაშიზმის უმთავრეს შინაარსს, ერთადერთი გზაა თანამედროვე აშლილ და აფორიაქებულ ცხოვრების დასაწყობად, დასალაგებლად, და უფრო მტკიცე და საიმედო საფუძვლებზე დასამკვიდრებლად.

მაგრამ ასეთი ღრმა რევოლიუციის მოხდენისათვის, რასაკვირველია, საკმარისი არ არის ამისი სარგებლობიანობის შეგნება და არც სათანადო გვეგმის მიღება. იტალიის ცხოვრების სიღრმეში აღმოჩნდა სათანადო მორალური ტრადიციები, წარსულ ცხოვრებათა ნაშთი და მემკვიდრეობა; მანვე წარმოშვა კიდევ ისეთი პიროვნება, როგორცაა მუკოლინი და მთელი წრე, რომელნიც გაიყენებენ და

გაიმსჯელებენ ამ სულიერ ძალით და მას ხორცი შეასხეს, გონებრივი შორსმჭვრეტელობითა და გამჭვრიახობით, ხასიათის სიმტკიცითა და დაუშრეტელი ენერგიით. ესაა უმთავრესი ფაქტორი თანამედროვე იტალიის აღორძინებისა, თორემ კარგი სოციალური და პოლიტიკური გეგმები წინეთაც მრავალი დაწერილა.

მსოფლიო ვითარების ასეთ ორომტრიალში მოქცეულ ჩვენს ერსა და ეროვნულ საქმეს უამრავი სიძნელე და დაბრკოლება ეღობება წინ, უამრავი საფრთხე და საშიშროება; დიდი გამძლეობა, მხნეობა და სიმტკიცე სჭირიან მას და ასევე დიდი სიფრთხილე და გამჭვრიახობა. მაგრამ ჩვენი ხანგრძლივი ისტორიის გზაზე „რა არ დაგვხდენია თავს, გვეუბნება დიდი ილია; რა მტრები მოგვეყვინა. ვიი-ვაგლახი, რა სისხლი, რა ღრუბენა კბილთა არ გამოგვივლია. რა წისქვილის ქვა არ დატრიალებულა ჩვენს თავზედ, და ყველას გაუძელით, ყველას გაუმავრდით, შევიწახეთ ჩვენი თავი, შევირჩინეთ ჩვენი ქვეყანა, ჩვენი მიწა-წყალი“. ჩვენი ერი კვლავ გაუძლებს და გადაიტანს ამ ახალს განსაცდელს. ამის საწინდარია ის საამაყო მხნეობა, სიმტკიცე და გამძლეობა, რომელსაც იჩენს ჩვენი ერი მიმდინარე ბრძოლის გზაზე. მართალია ამ ბრწყინვალე ბრძოლის გზაზე, აქა იქ შავი წერტილებიც სჩანს, მაგრამ საბედნიეროთ ეს მას ვერ წაშლის და ვერ დაჰფარავს. ამიერიდან ჩვენ გვაქვს სრული უფლება აღვიაროთ, რომ ყველაზე უფრო დიდს ასეთს შავ ლაქს წარმოადგენს ჩვენი ემიგრაცია. მისი დაცემისა და დაქვეითების პროცესი მეტად ღრმად წავიდა ამ უკანასკნელ წელთა განმავლობაში. ყოველივე სხვას რომ თავი დავანებოთ, ამის საკმარის ნათელ სურათს იძლევა ის, რაზედაც ბ. დ. ვაჩნაძე მოგვითხრობს ქვემოთ. ჩვენს ერს მხოლოდ ორი პოლიტიკური გამოცემა ჰქონდა ნახევარი საუკუნის წინეთ და ამ ორგანოებში კარგად თავსდებოდა ჩვენი მაშინდელი ცხოვრების ჭირ-ვარამი, აზრი და ფიქრი. ექვსიოდე პოლიტიკური გამოცემა მოეპოვება ქართულ ერს მისი დამოუქიდებელი არსებობის ხანაში, და ამ ორგანოებში ეტეოდა ჯერ კიდევ დაულაგებელი, თავმოუყრელი, აშლილი და ძალზე გართულებული ცხოვრების ყველა ნაკადები და მიმდინარეობანი. ხოლო სამშობლო მიწა-წყალსა და მის რეალურ ცხოვრებას დაშორებულ ერთ მუჭა ემიგრაციას, ორასიოდე მის მკითხველს დაარსებული აქვს **ცამეტი პოლიტიკური გამოცემა!** ყველა ამ გამოცემებს ამშვენებს მაღალ-მაღალი ლოზუნგები, ინტერნაციონალური, სოციალური, პროლეტარებო ყველა ქვეყნისა შეერთდით, ინტეგრალური პატრიოტიზმი, წმინდა წყლის ნაცონალიზმი, ერი და სამშობლო, სამშობლო და ერი. ხოლო შინა-არსი მათი დამუდმივი საქმე სხვა რა უნდა გამოიძენოს ამდენი გამოცემის ასავსები თუ არა პირადული და ჯგუფური ზრახვებით ემიგრაციის ყოველ-დღიური ჭუჭყისა და სიმყარალის გამოძიურება, საქვეყნოდ გამოფენა, მასში მუდმივი ხელის ფათური, და ყოვე-

ლივე ეს, რასაკვირველია, საქართველოს დროშის, მეგრძოლი ერის სახელით! სხვა რა კეთილ მიზანს უნდა მიაღწიოს ასეთმა პრესსამ გარდა ერთად-ერთისა—შენც წახდი, მეც წამახდინე, ქრისტე აღსდგა გიხაროდეს!

ქართული ემიგრაციის დარღვევის პროცესი აჩქარებული ტემპით მიმდინარეობს და ნუ თუ მასში აღარ მოიპოვება მცირე წრე, მცირე ჯგუფი მაინც, რომ ახდილად და გაბედულად გადაეღობოს ასეთს პროცესს? ჩვენ მტკიცედ გვწამს, რომ ქართველი ერი ამ დიდ განსაცდელსაც დააღწევს თავს. ნუ თუ ემიგრაციას არ უნდა გადა-რჩეს ისეთები, რომელთაც შეეძლებათ, თავის სამშობლოში დაბრუნებულთა, თამამად და გაბედულად წარდგომა მშობელი ერის წინაშე? ნუ თუ ქართული ემიგრაცია ერთსულოვნად ურიგდება ისეთ პერსპექტივას, როდესაც ჩვენს ერს სამართლიანი უფლება ექნება სამშობლოში დაბრუნებულ ემიგრაციას თვალეზში ჩააფურთხოს და უთხრას — მიიმე განსაცდელთა ჟამს, მე შენზე დიდს იმედებს ვამყარებდი, შენგან შეველასა და დახმარებას მოველოდი; ამის ნაცვლად, შენ დაეცი, გათახსირდი და მით შელახე ქართული სახელი და ქართული ღირსებაო. ემიგრაციის ცამეტ გამოცემას ხუთმეტ პარტიას და დაჯგუფებას და ოცდახუთმეტ ამათ ლიდერს არასოდეს არ უნდა ავიწყდებოდეს მათი ნამოღვაწარის ეგზომ მშვენიერი და სასახელო მიღწევა და დაგვირგვინება.

აღ. ასათიანი.

ქართული სამხედრო სკოლა

მიმდინარე წლის სექტემბრის ხუთს, შესრულდა მეხუთმეტე წელი ქართული სამხედრო სკოლის დაარსების დღიდან. სამხედრო სწავლის დამკვიდრებისათვის, ისიც სრულიად ახალს საფუძველზე, ხუთმეტე წელიწადი ფრიად მცირე მანძილია. ქართულ სამხედრო სკოლას სკიროდა არა მარტო მოსწავლეთა მორიგ ფენის აღზრდა და გაწვრთნა მხედრულ საქმეში, არამედ თვით მასწავლებელთა გამოზრდა, და თვით მათი გადაყვანა ქართული მხედრული საქმის ნიადაგზე, ქართული სამხედრო სწავლის შექმნა, ქართული მხედრული გაწვრთნის წესების გამომუშავება, სამხედრო საქმის სწავლაში ქართული სულის შეტანა, წარსულ დროთა ქართულ მხედრულ მემკვიდრეობის გამოძებნა და ახალი სწავლის ამ ძველ ძირებზე დამკვიდრება. ხუთმეტე წელი მცირე დროა ყოველივე ამისათვის, მაგრამ ქართული სამხედრო სკოლა ხუთმეტე წელიწადი კი არ არსებულა, არამედ მხოლოდ ხუთმეტე თვე. ასეთი იყო სკოლის არსებობის მანძილი მისი



30753



დაარსებიდან საბჭოთა რუსეთის შემოსევამდე. და ქართულ სამხედრო სკოლის დაარსების 15 წლის თავი შეეხება სწორედ ქართული სკოლის არსებობის ამ ხუთმეტოდე თვეს. რასაკვირველია ასეთს ვადაში სკოლა ვერ მოგვეცემა ჩვენ სამხედრო საქმის ახალს სარდლობას, ახალს სპეციალისტებს. ხუთმეტი თვე საკმაო თუ არის იმისთვის, რომ ჯარისკაცი აღიზარდოს და არა სარდალი. ქართული სკოლის ხანმოკლე არსებობის დიდი ღვაწლი და დამსახურება სწორედ იმაშია, რომ თუ მან ვერ მოასწრო დაემზადებინა ახალი ქართველი სარდლები, მან შესძლო ეჩვენებინა ქართველ ერისათვის, ქართულად აღზრდილი ჯარისკაცის მაღალი ხარისხი და ღირსება. სამხედრო სწავლას რომ დაძლევენ ქართველი ახალგაზდანი, როგორც სწავლის სხვა დარგებს, ეს საეჭვო არავისთვის იქნებოდა. უფრო გამოუცნობელი იყო ქართული ჯარის ღირსება-ნაკლულეევანობა, როდესაც ის ახალს, წმინდა ქართულ ნიადაგზე ეწყობოდა. შორეული წარსულის თუ რუსეთის ბატონობის ხანის ცნობები ბევრ რამეში მოითხოვდენ ჩვენ ახალს დასტურსა და შესწორებებს. ჩვენი დამოუკიდებლობის ხანაში გვყავდა ჯარის ერთეულები, მაგრამ შეიძლება ერთათ ერთი სამხედრო სკოლა იყო, რომელმაც შესძლო თავის მოწაფეთათვის მიეცა ის მხედრული გაწვრთნა, რომელსაც საჭიროებს კარგად აღზრდილი ჯარისკაცი. ამის მეტად მიღებულ სწავლის გაგრძელება არ ღირსებია ქართველ იუნკრებს, კარგად აღზრდილ ქართველ ჯარისკაცის ყოველი საუკეთესო ღირსებები მათ სრულად გაამქდავენეს სამხედრო სკოლის ხანმოკლე არსებობის დროს. ქართველმა იუნკრებმა დაანახეს ქართველ ერს, თუ რას წარმოადგენს ქართველი მხედრობა, უკეთუ ის სწორსა და მტკიცე საფუძვლებზე აშენდება. ტაბა - ხმელამ დაუმტკიცა ყველას თანამედროვე ქართველობის იგივე დიდი მხედრული ღირსებები, რომელიც ასე ამშვენებდა საქართველოს დიდებულ წარსულს. ქართველ იუნკერთა შემადგენლობის ნახევარი შეეწირა ამ სახელოვან დემონსტრაციას და ვისაც საქართველოს მომავალი სწამს, ის ადვილად გაიგებს თუ რა დიდი მნიშვნელობა ექნება მომავალ ქართველ სამხედრო ძალის დაფუძნებისათვის ქართველ სამხედრო სკოლის ხანმოკლე ისტორიას, მის იუნკერთა მძიმე ბრძოლებს, მძიმე მსხვერპლს და სამხედრო მავალითს. სამშობლოსათვის დაღუპულ სამხედრო სკოლის იუნკრებსა და მათ მასწავლებელთ დიდება და საუკუნო ხსოვნა, ხოლო ცოცხალთ გამარჯვება და სასახელო მომავალი.

მხედარი.



ქართული ემიგრაცია და მისი პრესა

ცნობილი დიოგენი ფარნით ხელში, დღისით, მიადგა ბერძენთა აეროპაგში, მართველ ხალხს სათითაოდ უნათებდა პირსახეს და მერმე თავის ქნევით შორდებოდა. ჰკითხეს: „ვის დაეძებ აქ დიოგენო?“ „ამ ჩვენ ბრძენთა წრეში ადამიანს დავეძებ, ადამიანს... ხალხი კი არი, მაგრამ ადამიანი ვერ მოვნახე“—ო უპასუხა დიოგენმა.

ახლა „დიოგენის ფარნით“ მიადექით მრავალრიცხოვან ქართულ ჟურნალ - გაზეთობას, რომელიც ქ. პარიზში იბეჭდება და ერთი ნამდვილი საერო ქართული გაზეთი მონახეთ?

ქართული პოლიტიკური პრესა საზღვარ - გარედ ოღონდაც რომ გვაბადია, მაგრამ ქართულ ეროვნულ სახის გამომხატველი ორგანო კი არა.

300 - იოდე ქართველ მკითხველს (თუ ეს რიცხვი გადამეტებული არაა) ვამუღმებთ ურიგდება ათამდე სხვა და სხვა ქართული პერიოდული გამოცემა: პარტიული, ფრაქციული, ჯგუფური და პიროვნული. გულმოდგინეთ გადასინჯეთ ამ უქანასკნელ წლების მათი შინაარსი; თქვენს მტერს: დაუსრულებელი დავა დოქტრინების გარშემო, შეჯახება პარტიული, ფრაქციული და პიროვნული თავდასხმები. ერთი სიტყვით — ჩხუბი და კრივი. ამ სადავიდარაბო მიწერ - მოწერაში თუ წააწყდებით დამშვიდებულ ნაწერს, ხშირად ისიც ჯგუფურ - პიროვნულ ტრაბახითა და თავმოძვონე თამაღურ წყლიან ფრაზეოლოგიითა გატენილი. იშვიათად თუ მონახეთ მათ ფურცლებზედ სასარგებლო ცნობებს თუ გამოკვლევებს საქართველოს მდიდარ წარსულიდან (რომლის ცოდნა ყველას ასე გვაკლია), დალაგებულ აწონ - დაწონვას საქართველოს დღევანდელ ყოფა - მდგომარეობისა, მისი მომავლის გონიერ განსჭვრეტის ცდას... აბა დაითვალეთ რა ჯანი, რა ფული, რამდენი მძიმე ემიგრანტული წლები დაახარჯა დამშეულ ერთი მუჟა ქართველობამ საზღვარ - გარედ ამ თავის „ბეჭდვითი საქმეს“ და რა შედეგებს მიადღია?

სამხრეთ საფრანგეთის ერთს ქალაქში, სადაც რამოდენიმე ათეული ქართველი ბინადრობს, ერთი იქაურ ქართველის ბინაზედ ჩემს მეგობარს თახჩაზე დალაგებული ახალ - ახალი ქართული გამოცემანი შეუძმნევია... ხუმრობით ჰკითხა: კაცო, რა სუფთად შეგინახია ჩვენი ჟურნალ - გაზეთები; ალბათ არც კი წავიკითხავს“. — არ შემეცდარხარ, ჩემო მეგობარო, — უპასუხე მან — უცხოეთში ნაბეჭდ ქართულ ჟურნალ - გაზეთებს კი ვღებულობ და ვინახავ კიდევ, მაგრამ აღარა ვკითხულობ... არც ჩემი მიმართულებისას და არც სხვისას; ან რა უნდა წავიკითხო? წლიდან -- წლობით ერთი და

იგივე დაღეჭილ - გადაღეჭილი, ზერელა თეორიული დაევბი, ერთ-მანეთის თრევა შეზავებულ თუ ჯგუფურ თავმომწონე პრანჭიობით. არავითარი საზრდო სულისა თუ გულისათვის. მიჩვენია ფრანგულით ვისაზრდოვო. და აკი აქაური ქართველობა, ამ მხრივ, მთლად გაფრანგების გზას დაადგა და ქართულ ნაბეჭდს აღარ ეკარებინან. . ვაი ჩემს თავს, თუ ეს ნაწერები საქართველომდის აღწევენ, წარმოდგენილი მაქვს, თუ რა შთაბეჭდილებას სტოვებენ იქ... საზარელს!.. ეს წრფელი გამოძახილია პატოსან ქართველი მკითხველისა, — აი ერთი სამწუხარო შედეგთაგანდ პარიზის ქართულ პრესის ..ღვაწლისა.

ეხლა ვიანგარიშით ამ ქართულ ემიგრანტულ პრესის ზეგავლენა პატარა ქართულ ემიგრანტულ საზოგადოებრივ ცხოვრებაზე. ქართულ საზოგადოების მცირე ძალთა დაგროვების მაგიერ, დაქუცმაცებულ ქართული პრესა, „საკუთარ სამრევლოს“ მიმართულებათა მატარებელი, ნამდვილად თავისი მავალითით და გავლენით ქართულ საზოგადოების დაშლას ემსახურება. ამ ბოლო ხანებში, სულ ანაზღვეულათ, ჩვენს სარბიელზედ უცნაურმა ორგანიზაციებმა სოკოებსავით თავი ამოჰყვეს — მიხედვით: წლოვანებისა, წოდებრივობისა, პროფესიებისა და სხვა. ამ ახალ ქართულ „ატომებში“, თითოში ათ კაცზე მეტს ვერ დასთვლით (წესდების დამტკიცების შემდეგ ეს რიცხვი 3-4 წევრამდე ჩამოდის); მხოლოდ ზოგ მათგანს, არც საღსარი, არც უნარი, არც მიზნის გაცემა შესწევთ. კმაყოფილებიანი იმით (ცხადია, ორიოდ კაცის თავმოყვარეობა), რომ „თავისი ორგანიზაცია“ აბადიათ.

ეს დაქუცმაცების ჭირი კაი ხანია მოედო ჩვენს ემიგრანტულ წრეებს და ამის წყალობით ველარ მუშაობენ ჩვენი ძველი მთლიანი და საერთო ქართული დაწესებულებანი (ქართული ასოციაცია, ავადმყოფთა დამხმარე კომიტეტი, საეკლესიო საზოგადოება და სხვა), ჩვენდა სავალალოდ დღემდის ვერ მოეწყო, ვერც ერთი საერთო ქართული კულტურული საქმე (წიგნთსაცავი -სამკითხველო, ჭრთული გამომცემლობა, ქართული კულტურის შესწავლის წრე და სხვა ამგვარი), რადგან ქართულ პრესის პოლიტიკანობამ გააფუჭა ხალხი. ჩვენს დღევანდელ ვითარებაში სამი ქართველი ისე ერთმანეთს ველარა ხვდება, რომ—ერთი მათგანი დანარჩენ ორთან გამწყრალი არ იყოს, ან და „დაყოფვის“ სენით მოწამლული არ გაუწყრეს მათ უბრალო მეგობრულ მუსაიფის დროს. მახსენდება თბილისში, ბერლინიდან ჩამოსულ (1917 წ.) ჩემი მეგობარ მ. წერეთლის პასუხი ჩემს შეკითხვაზედ, თუ როგორ არიან და რას აკეთებენ ქართველი ემიგრანტები, ასეთ დღიად ხანაში ევროპაში ?

„ძმაო გამოგიტყდები... რა უნდა აკეთონ, როცა ყოველი ქა-

რთველი გიჟია, ან და ხვალ გაგიჟდება! ნუ იცინი... ღმერთი, რჯული მართალს გეუბნები. მერწმუნე, რომ ყველა ვისაც ვიცნობ, საგიჟეთის წევრია, მარა ჯანდაბაა, როცა ათიოდე ქართველი ვერაფერში მორიგდნენ და ყველას თავის თავი ჰინდებურგად ან ლოიდ-ჯორჯათ მოაქვს რა ცალ-ცალკე გაიძახიან: მე... მე ვაკეთებ... მე ვაკეთებ... ჩემი მიმართულება... ჩემი აზრი... ამ საგიჟეთში რა უნდა ვაკეთდეს“?.. მაშინ მე ცხარედ წავედავე მიხ. წერეთელის მიერ ემიგრანტ ქართველების ასე სასტიკ შეფასებას; მაგრამ 17 წლას შემდეგ, მე თვითონ ემიგრაციაში ჩავარდნილი და ახლანდელ ჩვენი სინამდვილის მოწმე, მართლა ვრწმუნდები, რომ მიხ. წერეთელი არც ისე სცდებოდა. სჩანს ქართველობას დღემდის ყველგან სდევნის, მრავალ დაწეწილ-დაყოფილ საქართველოს ისტორიის წიაღიდან გამომდინარე, ძველი ფსიხიური სენი, გადაჭარბებულ ინდივიდუალიზმისა. შეკაზმულისა კუთხურ-პიროვნულ ეგოიზმითა და თავმოყვარეობითა, ეს უნდა იყოს თესლიც ახლანდელ ქართული „სიგიჟისა“!

აქ თვალწინ მეშლება ტლანქი, საზარელი ძველი სურათი ქართულ პროვინციების თუ კუთხეთა მეთაურების ერთმანეთზე აშლისა, თავდასხმებისა, ღალატისა, გაცემისა და ინტრიგებისა... მეძნელება ჩვენი ისტორიის ამ ბნელ ფურცლების გახსენება, მით უფრო ჩვენს ხანაში, როდესაც დროთა მანძილზე ეს ძველი, მწარე ამბები ჩაილურის წყალსა გაჰყვენ... მაგრამ რითი გნებავთ ახსნათ თანამედროვე ქართველების ასეთი უგონო ქცევა თუ არა ატავისტური მოვლენით?

რითი უნდა ახსნათ, მაგალითად, რომ ათიოდე მამულიშვილი ქართველი მწერალ-ჟურნალისტი ემიგრაციაში, რომელთაც ყველას ერთი მიზანი აქვთ დასახული — სამშობლოს დახსნა მტარვლის კლანჭებისაგან, იმის მაგიერ, რომ შეერთებულად, ერთი მაგარის წყობით საერთო მტერს შეუტონ — გადმომდგარან და ათი გაზეთის სვეტებიდან ერთმანეთს ქვა და გუნდს აყრიან?! ან და რითი ახსნით იმ მოვლენას, რომ რამოდენიმე ასეული პირისაგან შემდგარ ქართულ ემიგრანტულ საზოგადოებას, თითქმის ერთი მეორის გამაბათილებელი 15 უძირო ორგანიზაცია ამშვენებს (მზადდება კიდევ ახლების-დაარსება), და მათი დიდი თუ პატარა მეთაურნი ისტერიულად დღემდის გაიძახიან: ჩემთან დგომა... ჩემი დროშა... მე და ჩემს გარშემო... იმის მაგიერ, რომ ქართველების ძალების დაგროვებას ეცადონ, არა „ჩემის“ გარშემო, არამედ გარშემო საერთო ქართული იდეებისა: ქართულ კულტურისა და ქვეყნის განთავისუფლების საკითხებისა?

„ჩემიანობის“ ავადმყოფობა ეხლა ერთ ნაწილ ქართველ ახალგაზრდებსაც მოეღო, რომელნიც, უფროს თაობით უკმაყოფილონი,

მოსთხოვენ მას „გზიდან მოცილებას“ და მათი „წინ გაშვებას“. საბუთად მეტრიკას (წლოვანობას) ადგენენ. ალბათ ესეც ქართული ინდივიდუალიზმის ნაკადის ახალი ორიგინალური ვერსიაა. ნაცვლად ქუჩისა და საქმის ნაყოფისა, ეს პირები, საზოგადოებრივ მუშაობის წეს-რიგში, ახალგაზრდულ კუნთების და მკლავების საბუთს აყენებენ. საერთოდ ქართული სათვისტომოს დაშლის პროცესი ისე შორს გაექანა და ისეთი გაბოროტებული სახე მიიღო, რომ ადამიანი აღარაფერს ერიდება. ფარულად და ახდილად ზოგი ერთი მოქიშპე პასუხისმგებელ პოლიტიკურ მოღვაწეებმა უცხოელი გამოცემები (განსაკუთრებით რუსული ენისა) საარბიტრაჟო დაწესებულებად გაიხადეს და დრო გამოშვებით მათ ფურცლებსა ქართული დავის და შინაურ აყალ-მაყალის ნაგვითა ავსებენ.

აი ასე ამღვრეულია ქართული ემიგრანტული შინა ვითარება, მის ლტოლვილობის მე-14 წლის დასაწყისში. ვიშვორებ, ამაში უდიდესი წილი უდევს პასუხისგების გრძნობა დაკარგულს, ხელოვნურად გამრავლებულს, აშლილ-დაშლილ ქართულ პოლიტიკურ პრესას და მის ზოგი ერთ მოღვაწეთა და ხელმძღვანელ ეგოისტურ მანევრავლენას.

მისივე წყალობით, ჩვენი, შედარებითი კულტურული ქართული საზოგადოება, მთლად ჩავარდნილია მღვრივე მორევში და იძირება. ყოველ გვარი საქმიანობა შეჩერდა. ძველი ქართული ზნეობა და რაინდული ყოფა-ქცევაცა ჰქრება... და „ევროპიელდება“ იმ დარგებში, რომელსაც, საზოგადოთ, არც ევროპაში და არც აზიაში, არც პიროვნულად, არც ეროვნულად, არასოდეს და არავისათვის კაი სახელი არ მოუხვეჭია.

დ. ვაჩნაძე.

მობას სიტყვა, წარმოთქმული ერთა ლიგაში.

პოზიცია, რომელიც დაიკავა შვეიცარიის ფედერალურმა საბჭომ საბჭოთა კავშირის ერთა ლიგაში მიღების საკითხის გამო, ყველასათვის ცნობილია. ერთნი აკრიტიკებენ მას, მეორენი იცავენ; იგი ეწინააღმდეგება აქ წარმოდგენილ დელეგაციათა უმრავლესობის აზრს და განსაკუთრებით სამ დიდ სახელმწიფოთა განზრახვებს. ამიტომ შვეიცარიის კონფედერაციის პოზიცია უნდა იქნეს აქ ახსნილი და დასაბუთებული. მე შევეცდები ეს ვქნა იმ ზომიერებით და თავდაქირილობით. რომელიც უზრუნველყოფენ საბუთების დამარწმუნებლობას: მაგრამ ამავე დროს ვილაპარაკებ იმ სრული გულ-

ახდილობით, რომელიც შეადგენს ჩვენს მოვალეობას ურთიერთის წინაშე.

შვეიცარია ერთად ერთი ქვეყანაა, რომელიც ერთა ლიგაში შევიდა პლებისციტის, ე. ი. მთელი ჩვენი ხალხის და კანტონების ხმის მიცემის გზით. ამ არსებითი საკითხის ირგვლივ გამართული ბრძოლა იყო ერთი ყველაზე უფრო სადაო და ვნებათა ღელვის გამომწვევი ჩვენი ხანგრძლივი ისტორიის მანძილზე. ფედერალური მთავრობა ჩაება ამ ბრძოლაში მთელი თავისი ავტორიტეტით და მისი ხმა გაგონილი იქნა. ერთა ლიგის დამაარსებლებმა ჩვენ გამოგვიცხადეს ნდობა ქენევის არჩევით ახალი დაწესებულების რეზიდენციათ. ჩვენი საზოგადოებრივი აზრი ყოველთვის აფასებდა და აფასებს ამ დიდ პატივისცემას. იმ ფაქტს, რომ ერთა ლიგა იმყოფება ჩვენს ტერიტორიაზე, სხვათა შორის ის დადებითი მნიშვნელობა ქონდა, რომ მან ჩვენი საზოგადოებრივი აზრი უფრო მეტად მიაპყრო ერთა ლიგის მუშაობისა და მოღვაწეობისაკენ, ვიდრე სხვა ქვეყნებში. დაწესებულებათა სიახლოვე თითქმის ყოველთვის აძლიერებს მათდამი ინტერესს.

ჩვენ ყოველთვის უნივერსალობის მტკიცე მომხრენი ვიყავით; ჩვენ ეს დავამტკიცეთ ჩვენივე მოქმედებით. მე რომ უხერხულობას არ ვერიდებოდე, გავიმეორებდი ჩემს ნათქვამს და მოგაგონებდით, რომ ჩემს სიტყვაში 1920 წ. 20 ნოემბერს — ჩვენს პირველ საზეიმო კრებაზე — მე პირდაპირ მოვიხსენიე რუსეთი და გამოვთქვი სურვილი, რომ მას, განკურნებულს თავისი გატაცებისა და თავის ვაებებისაგან მიემართა ერთა ლიგისათვის და ეპოვა მისგან საჭირო დახმარება აღდგენისათვის.

შვეიცარიის მთავრობას, რომელიც აღჭურვილია რუსის ხალხისადმი მეგობრული სურვილებით, არ სურდა ეცნო იქ არსებული რეჟიმი — დე-იურე; მან გადასწყვიტა დარჩენილიყო ამ არცნობის და ლოდინის პოზიციაზე. ჩვენი მისია პეტერბურგში დარბეულ იქნა 1918 წელს და ერთი მისი მოხელე მოკლული. ამის გამო — მათგან არას დროს ბოდიშის მსგავსი რამეც კი არ გვსმენია. 1918 წელში, როდესაც საერთო გაფიცვის ცდამ, სამოქალაქო ომის საშინელებაში კინალამ გავცხვია; საბჭოთა მისია, რომელსაც ჩვენ მანამდე ვითმენდით ბერნში, განდევნილ იქნა შეიარაღებული ძალის საშუალებით, ვინაიდან ის აგიტაციაში მონაწილეობას იღებდა.

როგორც კი მიმდინარე წელს, დიპლომატიურ წრეებში, საბჭოთა კავშირის ერთა ლიგაში მიღების შესაძლებლობის შესახებ ლაპარაკი დაიწყო, ფედერალურმა საბჭომ ყოველივე ყოყმანის გარეშე ამცნო პარლამენტს, რომ ის თანაგრძნობით არ უცქერის ამ წინადადებას. — და მართლაც, ამ საკითხზე დადებითი პასუხი იქნებოდა — დიპლომატიური ურთიერთობის აღდგენა — იურიდიულათ თუ არა,

ფაქტიურათ მაინც. ასეთ რამეზე ლაპარაკიც კი არ შეიძლებოდა. ფედერალურმა საბჭომ, რომელიც ასე ხანგრძლივით სიფრთხილეს იჩენდა, იმ მომენტში დადგენილების გამოტანისაგან თავი შეიკავა — მანამდის, სანამ სათანადო საჭიროება არ მოითხოვდა მისგან კავტეგორიულათ ეთქვა: „არა“ — თუ თავი შეეკავებია. უკანასკნელი კი იქნებოდა შერბილებული ფორმით „უარის“ თქმა. მას შემდეგ და იმის მიხედვით, რაც საბჭოთა კავშირის მხრივ ერთა ლიგისადმი მიმართვის შესაძლებლობა ახლოვდებოდა და ძლიერდებოდა, ჩვენი საზოგადოებრივი აზრი დიდის ინტერესით მიუღდა ამ საკითხს. მე ქვევით ავიხსნით, რისთვის და როგორ გამოიხატა ეს საზოგადოებრივი აზრი, მაგრამ უწინარეს ყოვლისა გთხოვთ ნება დამრთოთ ავიხსნათ მისი არსება და მნიშვნელობა.

ჩვენი საზოგადოებრივი აზრი ყოველთვის თავისუფალია. იგი ამავე დროს უშუალოა. ჩვენში პრესის სრული თავისუფლებაა. ფედერალური საბჭოსთვის არც კი არსებობს ოფიციალური პრესის მცნება. მაღლიდან არ მოდის არც ზეგავლენა და არც ღირეკტივები. ამავე დროს ჩვენში არსებობს ყოველგვარი პატრიოტული კავშირები, რომლებიც ანვითარებენ და ინახავენ მოქალაქობრივობის სულს. რომ სხვანაირათ ყოფილიყო, ჩვენ არ ვიქნებოდით ის დემოკრატია, რომელიც ვართ. ჩვენი დემოკრატით ჩვენ ვამაყობთ. ის არის ჩვენი არსებობის ერთი რეზონთაგანი. არ არის დემოკრატია. — შევიცარიაც არ არის. მაშასადამე, თუ დიდმნიშვნელოვან საკითხის გამო, — პრესსა და პატრიოტული ასოციაციები, განურჩევლათ პარტიებისა, რაიონებრსა და ენებისა, დიდის უმრავლესობა ერთდამივე აზრს გამოთქვამენ, ეს იმას ნიშნავს, რომ ჩვენ ვიმყოფებით — ნათლათ — გამოთქმულ ეროვნულ ნების წინაშე. მთავრობამ მას ანგარიში უნდა გაუწიოს. ის ასე უნდა მოიქცეს მით უმეტესს, თუ მისსა და საზოგადოებრივ აზრს შორის თანხმობა არსებობს. ასეა ამ შემთხვევაში.

აი როგორ ისმება ჩვენს წინაშე საკითხი საბჭოთა კავშირის ერთა ლიგაში დაშვების შესახებ, თუ მხედველობაში მივიღებთ — რაც მთავარია, და მეორე ხარისხოვანს კი უკუვავადებთ. იმ რეჟიმმა და მთავრობამ, რომლის დოქტრინა და სახელმწიფოებრივი პრაქტიკა არის ექსპანსიური და მეზობროლი კომუნისში, შეასრულა აუცილებელი პირობები, რომელნიც საჭირონი არიან მისი ჩვენს შორის დასაშვებათ? არ შევრჩერდები ჩვენი წესდების არც შესავალზე და არც მის ცალკე მუხლებზე. შემეძლო ამომეკრიფა აქედან მეტათ მაგარი საბუთები, მაგრამ ეს მიმაჩნია მეორე ხარისხოვნათ შედარებით წესდების ძირითად პრინციპებთან, მის პირველ მიზანთან — ყველა: იმასთან, რაც მასში არ არის გამოთქმული, რადგან ის იმდენათ ბუნებრივია, რომ თავის თავად იგულისხმება.

ეს კომუნიზმი არის ყველა დარგებში—რელიგიურში, მორალურში, სოციალურში, პოლიტიკურში—უაღრესათ რადიკალური უარყოფა ყველა იმ იდეების, რომელსაც ჩვენ ვეყრდნობით და რომლებითაც ჩვენ ვცხოვრობთ. მრავალმა სახელმწიფომ კომუნისტების პროპაგანდაც კი აკრძალეს და ყველანი მას თვლიან სახელმწიფოებრივ დანაშაულათ, როგორც კი ისინი თეორიიდან მოქმედობის სარბიელზე გადადიან. საბჭოთა კომუნიზმი ებრძვის რელიგიურ იდეას და ყველა ფორმის სულიერ მოძღვრებას. ლენინმა რელიგია ოპიუმს შეადარა; სინდისის თავისუფლება მხოლოდ მოჩვენებაა. კულტის მოსამსახურეთ და მათ ოჯახებს ჩამორთმეული აქვთ სასურსათო ბარათები. ეკლესიები დაკეტილია და დანგრეული. მოსკოვში იყო 500 ეკლესია და სამლოცველო. ახლა არის 40. მთელა მსოფლიოს ქრისტიანული ეკლესიები საშინლათ განიცდიან იმათ დევნას, ვინც იქ ქრისტეს სარწმუნოებას მისდევს. ეგრეთ წოდებულმა პეტიციამ წამებულების შესახებ შეჰკრიბა შარშან შევიცარიასი 200.000-ზე მეტი ხელის მოწერა.

კომუნიზმი ხრწნის ოჯახს. აუქმებს კერძო ინიციატივას და კერძო საკუთრებას. მიმართავს შრომის ისეთ ფორმებს, რომლის გარეშეა ძნელია იძულებითი მუშაობისაგან. რუსეთში მძინვარებს საშინელი რისხვა სიმშვილისა და სრულიათ მიუდგომელი მეთვალყურენი თავის თავს ეკითხებიან—არის ეს სიმშვილი შედეგი ბუნებრივი მიზეზებისა, თუ ძირითადათ უკულმართ ეკონომიურ და სოციალურ სისტემისა? მაგრამ კომუნიზმის ყველა ეს განსხვავებული თვისებები, რომელთა ობიექტურათ აღნუსხვას მე ვცდილობ, კიდევ არ იძლევიან საკმარის წარმოდგენას რუსულ კომუნიზმზე. საჭიროა მათ დავემატოთ კიდევ ერთი არსებითი და უაღრესი თვისება, რომელიც მას საბოლოათ ყოფს შეუთავსებლათ საერთაშორისო ურთიერთობის ერთ ფრიათ საჭირო და საყოველთაოთ მიღებულ პრინციპთან. რუსული კომუნიზმი ცდილობს დამკვიდრდეს ყოველგან. მისი მიზანია მსოფლიო რევოლიუცია. მისი ბუნება და მისწრაფებაა, პროპაგანდა აწარმოოს თავის ქვეყნის გარეშე. მისი სასიცოცხლო კანონია ექსპანსია, რომელიც სცილდება მის პოლიტიკურ საზღვრებს. თუ კომუნიზმი ამაზე უარს იტყვის, ის უარყოფს თავის თავს, თუ არ უარყოფს, ის ხდება ყველასი მტერი, რადგან იგი ემუქრება ყველას. შემძლო ადვილათ დამედასტურებია ყოველი ჩემი ნათქვამი ბოლშევიკურ ოფიციალურ ლიტერატურიდან ამოკრეფილ ნამდვილ ტექსტებით, მაგრამ არ შეგაწუხებთ არა საჭირო ციტატებით. სიტყვა ეხება უდავო ჭეშმარიტებას...

ვიცი, რას მიპასუხებენ ამაზე: ლაპარაკობენ კომუნისტურა პარტია და ბოლშევიკური სახელმწიფო არ უნდა აღრიოთ ერთმანეთშიო.



ეგ არ არის პასუხი. ბოლშევიკური სახელმწიფო, რუსული კომუნისტური პარტია და მის მიერ შობილი მესამე ინტერნაციონალი, წარმოადგენენ ერთ მთელს. ბოლშევიკური სახელმწიფო დაარსებულ იქმნა კომუნისტურ პარტიის პროგრამის ცხოვრებაში გასატარებლათ. ლენინი თავის პიროვნებაში აერთებდა სახელმწიფოს მეთაურს და პარტიის მეთაურს. ახლანდელი გენერალური მდივანი ფორმალურად არ არის სახელმწიფოს მეთაური, მაგრამ ნამდვილად კი მისი პატრონია. სახელმწიფო და პარტია განუყოფელი არიან. პარტია ბრძანებლობს, სახელმწიფო ასრულებს.

არის მეორე უფრო მნიშვნელოვანი მოსაზრება. მე მინდა ჯერ მოგახსენოთ ის და შემდეგ განვიხილო.

საბჭოთა კავშირი შეადგენს—მეტყვიან—გებერთელა ტერიტორიას 165 მილიონი მცხოვრებით. საშიში იქნებოდა ანგარიში არ გაგვეწია და განზრახ გაგვერიცა ისეთი სახელმწიფო, რომელიც მიბრუნებულია ერთი მხარით აზიისა და მეორეთი ევროპისაკენ და რომელიც—ასე ვთქვათ—ორი კონტინენტის ჯვარედინზე მდებარეობს. ერთა ლიგა წარმოადგენს საერთაშორისო თანამშრომლობის მხოლოდ ერთ ახალ ფორმას; ის არის არა ზნეობრივი დაწესებულება, არამედ პოლიტიკური ასოციაცია, რომლის მიზანია განსაკუთრებით და უპირველეს ყოვლისა ხელი შეუშალოს ომს და დაცვას ზავი. თუ რუსეთის მიღებას შეუძლია ხელი შეუწყოს ზავის საქმეს, ჩვენ უნდა შევეწყოთ ამ გარემოებას, მიუხედავად ყოველივე შიშისა, ეჭვებისა და ზიზღისა, რასაც განიცდიან მრავალი მთავრობები. არავის არ ეკრძალება იქონიოს იმედი, რომ საბჭოთა რუსეთის მუდმივი თანამშრომლობა სხვა სახელმწიფოებთან ერთა ლიგის წიაღში ხელს შეუწყობს ყველასათვის და უპირველეს ყოვლისა თვით რუსეთისათვის კეთილმოყოფელ ევოლიუციას.

თქვენ სამართლიანათ გეტოშებოდათ, ქალბატონებო და ბატონებო, მე რომ ასეთი შეხედულება მივიჩნია ყოველივე ღირებულეზას მოკლებულათ. საფრანგეთის, დიდი ბრიტანეთის და იტალიის მთავრობებმა უკვე ამცნეს ანალოგიური მოსაზრებანი ფედერალურ საბჭოს ჩვეულებრივი დიპლომატიური სავალეებით, ე. ი. ბერნში, მათი წარმომადგენლების პირით. ჩემსა, როგორც ფედერალური პოლიტიკური დეპარტამენტის შეფსა და მათ შორის მოლაპარაკება მიმდინარეობდა მეგობრულსა და ნდობის ატმოსფეროში. მე ერთხელაც არ მიმიღია შთაბეჭდილება ზეგავლენის, თუნდაც არაპირდაპირის და ყოველივე გაუგებრობის თავიდან ასაცილებლად საჭიროთ მიმაჩნია განვაცხადო ეს აქ.

მაგრამ თუ გავიგეთ თვალსაზრისი სხვა სახელმწიფოების და განსაკუთრებით დასახელებულ სამ დიდ სახელმწიფოსი, ჩვენ მიანც

იძულებული ვიყავით სხვა პოზიცია დაგვეკავებია. ისეთი სახელმწიფოს, როგორც შვეიცარიაა, რომელსაც არ შეუძლია და არც უნდა ითამაშოს როლი დიდ პოლიტიკაში, აქვს—და ეგ ბუნებრივია—თავისი საკუთარი შეხედულება. ოპორტიუნიზმი, თუნდაც მაღალი ხარისხის და სრულიად კანონიერი, ზოგიერთ შემთხვევაში ჩვენთვის აკრძალულია. ჩვენ შეგვიძლია შევეჯიბროთ სხვა სახელმწიფოებს, მხოლოდ ზნეობრივ სრულყოფილობის ძიებაში.

ბოლშევიკური წესწყობილების ისეთი ევოლიუცია, რომელიც თქვენთან ერთად ჩვენც გვინდა, ჩვენ არ გვჯერა. ჩვენ არ შეგვიძლია საყოველთაობის პრინციპის გულისთვის გავსწიროთ თუნდაც მინიმუმი იმ ზნეობრივ და პოლიტიკური დონესი, რომელიც სავალდებულოა ყველა სახელმწიფოებისთვის. ერთა ლიგა არის—ან იგი უნდა იყოს—ჩვენ თვალში კაცობრიობის ერთი უდიდესი ქმნილება და მიღწევა! როდესაც 1920 წლის 19 მაისს შვეიცარიის ხალხმა და კანტონებმა გადალახეს ტრადიციებზე დამყარებული ყოველგვარი დაბრკოლებანი და გადაწყვიტეს ერთა ლიგაში შესვლა, ისინი თავგანწირულად გამოეხმაურენ იდეალის მოწოდებას.

ახლა ყველა შვეიცარელი, რომელიც ატარებს პატრიოტულ ნაციონალურ შეხედულებებს, გრძნობს, რომ ერთა ლიგა მეტად სარისკო საქმეში ებმება. მას არ ეშინია შეაერთოს ცეცხლი და წყალი. თუ საბჭოთა რუსეთმა უცბად გაანება თავი იმ ერთა ლიგის ლანძღვას, იმ ლიგის, რომელსაც ლენინმა ავაზაკური წამოწყება უწოდა,—ეს მისი ახალი პოზიცია აიხსნება იმ ნიშნებით, რომელნიც სერავენ შორეულ აღმოსავლეთის ცას. ჩვენ არ გვაქვს რწმენა. ჩვენ არ შეგვიძლია მონაწილეობა მივიღოთ იმ აქტში, რომელიც მისცემს საბჭოთა რუსეთს დღემდე არ ქონებულ უპირატესობებს.

მაგრამ არჩევანი მომხდარია. *Alea iacta est*. ჩვენ გვირჩევნია გამფრთხილებელის როლში ვიყვეთ. ჩვენ ვისურვებდით, რომ გადაჭარბებული აღმომჩნდარიყოს ჩვენი შიში. ჩვენ იმედი გვაქვს, რომ ყველა სახელმწიფოები დაგვეხმარებიან, რათა ენევეა არ გადაიქცეს გამბრწუნელ პროპაგანდის კერათ. ჩვენ ვიდგომილებით სადარაჯოზე. ასეთია ჩვენი ვალი. ამ ეამად ჩვენთვის საკმარისია ის, რომ საბჭოთა რუსეთმა ვერ შესძლო ერთა ლიგაში შემოსვლა ერთხმად მოწოდებით, მისი წარსულის დავიწყებით და გამარჯვებულის გვირგვინით.

როდესაც ის იქნება მიღებული, საბჭო და საერთო კრება იქნებიან დაყენებული რამდენიმე ღიად დარჩენილ საკითხთა წინაშე. საერთო კრების მიერ საქართველოს დამოუკიდებლობის შესახებ გამოტანილი რეზოლიუციები ვერ დაიძინებენ მკვდრის ძილით. სომხეთი, უკრაინა, სხვა ქვეყნები კიდევ იპოვიან გაბედულ პირთ, რო-

მელნიც განაგრძობენ მათ ბედ-იღბალზე ზრუნვას. არ შეიძლება ითქვას: აწი ევ საკითხები არ დაისმებიან. მთელი მსოფლიოს სიმპატიები თან ახლავთ იმ გმირებს, რომელნიც იცავენ თავის სიცოცხლეს და თავის ბედს. ასეთ კითხვებს ვერ გააბათილებს დროთა მსვლელობა.

განსაკუთრებით მაშინ, როცა დელეგატები გამოჩნდებიან ჟენევაში, ჩვენ იმედი გვაქვს, გაისმება ხმები, რომ ადამიანური სინდისის სახელით განმარტება მოეთხოვოს მათ მთავრობას. ისინი დაგმობენ იმ ანტირელიგიურ პროპაგანდას, რომლის მზგავსი არ იცის კაცობრიობის მოდგმის მატთანემ და რომელიც გლოვასა და ცრემლებში აგდებს ყოველ ქრისტიანს, ყოველ ადამიანს, რომელსაც სწამს ღმერთი და მიმართავს მის სამართლიანობას.

მე გავათავე, შევეცადე გამეგონებია თქვენთვის შევიცარიელთა დიდი უმრავლესობის ხმა. ჩვენ არ გვაქვს არავითარი განზრახვა სხვებს ვასწავლოთ. მე ჩემს მოვალეობად ვთვლიდი მელაპარაკე თავისუფლად. ასე რომ არ მოგქცეულიყავ, მე ვულალატაბდი ჩემს ამოცანას.

ის ფაქტი, რომ ეს მეტად დელიკატური კამათი მიმდინარეობდა დამშვიდებულ გარემოებაში, საპატიოა ჩვენი კრებისათვის. შევიცარიის ხალხი დამშვიდებული მიიღებს თქვენი უმრავლესობის გადაწყვეტილებას იმ დემოკრატიული დისციპლინით, რომელიც გამომდინარეობს მის საუკუნეობრივ ტრადიციებიდან.

უდიდესი ქართული თარიღი

ათი წლის წინად ქართველმა ხალხმა ერთსულოვნად „ხელი ხმალს იკრა“ და აუჯანყდა წითელ რუსეთის ბატონყმობას.

საქართველო - რუსეთის 130 წლის დამოკიდებულობის ისტორიაში, ეს სისხლიანი ფურცელი ახალი არ არის.

როდესაც ძველმა რუსეთმა დაპირებულ დახმარება-მფარველობის მაგიერ (1783 წ. ტრაქ.), დაანგრია საქართველოს სამეფო და დაიპყრო მისი მიწა-წყალი; საქართველომ — 1804, 1810, 1812, 1820, 1832 წ.წ. აჯანყებებით უპასუხა.

ასევე მოხდა ჩვენს საუკუნეში, როცა კომუნისტურმა რუსეთმა ახლად აღდგენილ თავისუფალ საქართველოს დაპირებულ მეზობლურ მეგობრობის გაწევის მაგიერ (1920 წლის ხელშეკრულება), დააქცია მისი სახელმწიფო და ქართველ ხალხს დაადო მძიმე უღე-

ლი მონობისა, ამ გამეორებულ რუსულ ვერაგობას, ქართველობაჲ 1921, 1922 და 1924 წ.წ. ამბოხებებით უპასუხა.

ჩვენი დროის ამბოხებაში მხოლოდ ახალი და მაგარი ის არის, რომ ეროვნული მოძრაობა, მთელ საქართველოს სივრცეს მოედო: ყველა კუთხეს, ყველა წრეს, და მიუხედავად მისი მალე დამარცხებისა, მან უდიდესი კვალი დაამჩნია ქართველი ხალხის ეროვნულ ბრძოლის ისტორიას.

1924 წლის აჯანყებამ, ყველა მხარის ქართველობა, სულიერად და ეროვნულად ერთ მთლიან, მაგარ ერთეულად შეადგულა.

1924 წელმა მახლობელი და შორეული ქვეყნები საბოლოოდ დაარწმუნა, რომ საქართველოში ხალხი იბრძვის რუსეთის პოლიტიკურ-ეკონომიურ ტირანიისაგან განთავისუფლებისათვის და იბრძვის, სანამ თავის საკუთარ ლელოს არ გაიტანს. მანვე მოუღო ბოლო, მანამდე გავრცელებულ ცრუ შეხედულებას ქართველების ბრძოლაზე. ვითომდა იგი ყოფილიყო რუსულ მენშევიკ-ბოლშევიკურ პარტიათა შეჯახების უბრალო შედეგი.

პირიქით აღმოჩნდა, რომ 1924 წ. აჯანყების ფიზიკური მარცხი, უმთავრესად გამომდინარეობდა ქართული ეროვნული სხეულის ოცდაათი წლის განმავლობაში რუს მარქსისტულ დოქტრინებითა მოწამვლისა დასუსტებისაგან და არა ეროვნულ შეგნების გაქრობისაგან.

1924 წელს ერთი მუჟა ქართველი ხალხის, ას მილიონიან რუსეთის წინააღმდეგ გაბედულმა ამხედრებამ დაანახვა და დაარწმუნა მთელი მსოფლიო, პატარა გმირ ერის პოლიტიკრი მთლიანობა-სიძლიერეში ეროვნული თავისუფლებისათვის ბრძოლაში. ამისი გამოძახილია რომ ათი წლის შემდეგ, 1934 წელს, ერთა ლიგაში საქართველოს დამოუკიდებლობის საკითხი კვლავ დაისვა.

1924 წელი საქართველოს ახალ ისტორიაში, უდიდესი ეროვნულ თარიღათ შევა. ამ წელიწადმა, გაამთელა საქართველო შრგნით, გაამაგრა მისი განთავისუფლების საქმე გარედან და გაუკავდა საიმედო გზა ქართველებს, მომავალ გამარჯვებისაკენ...

ქართველ - სომხეთა ურთიერთობა

დ. ვაჩანაძის ნიტყვა

(სომხეთის დამოუკიდებლობის დღესასწაულზე წარმოთქმული).

ძვირფასო მეზობლებო!

საფრანგეთის ქართულ ასოციაციის გამგეობამ დაგვაწავლა, რომ მოგესალმოთ ამ დიად და ძვირფასს ეროვნულ დღეს, — ძვირფას არა მარტო თქვენთვის, არამედ ჩვენთვისაც.

ჩვენი ერების ისტორია ამოწმებს, რომ შორეულ ხანებში სომხები და ქართველები ერთად სჭედავდნენ თავის ეროვნულ საქმეს და შეკრულნი ერთის კულტურით, ერთის ისტორიულის ბედით, მხარ და მხარ გამირულად იბრძოდნენ თავის ეროვნულ თავისუფლებისათვის.

ამ ერთობის წყალობით, კავკასიის გუბისა და არარატის ძირში აღმოცენდნენ და განმტკიცდნენ სომხეთისა და საქართველოს სახელმწიფონი; და მრავალი საუკუნის განმავლობაში გამარჯვებით იგერიებდნენ სამტრო სტიქიონებისაგან თავის სამშობლო კერას.

მაგრამ ჟამთა და ბედთა ცვლელადობამ გააშორა ერთმანეთს ჩვენი ერები; ეს გაშორება მეტად ძვირად დაუჯდა სომხეთს და საქართველოს. იმ ხნიდან დღემდის განცალკევებულნი, იბრძოდნენ მარტობაში და გამუდმებით ჰკარგავდნენ თავის მიწებს, თავის მოსახლეობას და დამოუკიდებლობას.

ჩვენს თვალწინ გადიშალა ერთი ფურცელთაგანი ამ უბედურობისა: აღდგენილი ოსმან-რომანოვების იმპერიების ნანგრევებზე, სომხეთ-საქართველოს რესპუბლიკებმა ვერ მონახეს დროზედ ძველი და დაცდილი ერთობის გზა; ზედი-ზედ დამარცხდნენ და თან წაილეკეს თავისუფლება დანარჩენ კავკასიის ერებისა.

ძვირფასო მეზობლებო! დაგვიდგა დრო ამ ძველ გზაზე დადგომისა. ჩვენი დროის დიადი მოვლენანი და ის ხიფათი, რომელიც ემუქრება ჩვენი ერების ფიზიკურ არსებობას, განა არ გვავალებენ, დავუბრუნდეთ ჩვენი დიდ წინაპრების დიად ტრადიციას — ვიყოთ ერთად ქირში და ლხინში? ჩვენ ქართველები ვფიქრობთ, რომ დროა!

დროა ბრწყინვალე მაისის თვე გადავაქციოთ ჩვენი ერთობის რენესანსის გაზაფხულად... ერთობისა — კავკასიის ერებთან მჭიდროდ გადაწნულია და მაგარ კავკასიურ ნიდაგს დაყრდნობილისა.

უნდა ვეჩქაროთ. დრო ჩვენთანაა, მაგრამ არ კი გვიცდის. ქართული პოლიტიკური მიმართულებანი უკანდაუხევლად შედგნენ ამ გამოცდილ, ძველ ისტორიულ გზას, ერთობისა და კავშირისა თავის მეზობლებთან.

უკანასკნელ წლებში სომეხთა და ქართველთა პატრიოტები გულმოდგინეთ ცდილობენ ქართულ-სომხურ საერთო მეგობრულ პოლიტიკის აღდგენისათვის, მიმართულსა კავკასიის ყველა ერებისათვის სასარგებლოდ. და ჩვენ ღრმად გვწამს, რომ ეს მათი ცდა მიაღწევს თავის საწაღილს.

გადაეციოთ თქვენს მძიმედ ავადმყოფ ბელადს ბ-ნ ავეტის აგარონიანს, გულწრფელ დამცველს სომეხ-ქართველთა ერთობისა, მხურვალე ქართულ სალამთან ერთად ეს ჩვენი სიტყვა; იქნებ ეს უკა-

ნასკნელი სასარგებლო მალამოდ მოეველინოს მას და წამოაყენოს ფეხზე, სასიქადულო და გამოჩენილი მებრძოლი სომხის ერის თავისუფლებიანა.

ტ

და ბოლოს ნება მიბოძეთ ბატონებო, თქვენის სახით, ვუძღვნათ ჩვენი ქართული გულის სალამი გმირ, გაუტეხელ, კეთილშობილ სომხის ხალხს...

გაუმარჯოს სომხეთს!.. კეცე ჰაიასტან! მრავალ ჟამიერ სომხეთის ერს!

ა. ჯამალიანის სიტყვა

ქართველთა მილოცვაზე, საპასუხო მხურვალე მადლობის სიტყვა წარმოსთქვა ცნობილმა სომხის მოღვაწემ ბ. ჯამალიანმა.

ძვირფასო თანამემამულენო!

ნება მიბოძეთ, ქართველთა ასოციაციის წარმომადგენლის და ქართველ ეროვნულ პოლიტიკის აზრის გამომხატველის თავად ვაჩნაძის წარმოთქმულ სიტყვის შემდეგ, მოგახსენოთ ჩემი ორიოდ სიტყვა, მით უფრო რომ ამის საჭიროებას ძლიერად ვგრძნობ, რადგან სრულიად შემთხვევითი მიზეზის გამო მე ვერ მოვახერხე მისი წარმოთქმა დღეს ქართულ ეროვნულ დღესასწაულზე, სადაც ჩვენ, სომხებს, ქართველები დაგვხდნენ განსაკუთრებულის თბილი გრძნობითა და ყურადღებით.

სრულიად ცხადად მიმაჩნია, რომ დიდი საერთო ინტერესება აიძულებენ ყველა კავკასიელ ერებს აუცილებელ მჭიდრო ძმურ კავშირისათვის საერთო განთავისუფლების მიზნების მისაღწევად...

მაგრამ მათ შორის, მე მინდა შევაჩერო თქვენი ყურადღება საქართველო - სომხეთის ისტორიულ დამოკიდებულებაზე და გავახსენოთ მათი მრავალ საუკუნოვან არსებულ კავშირის ამბავი.

ქართველ - სომხთა ძმური დამოკიდებულების საძირკველი ჩაყრილია თავიდანვე ჩვენი ერების ხალხურ ეპოსში. ცნობილ ქართულ მატინეში „ქართლის ცხოვრებაში“ სომხები და ქართველები ჩამომავალნი ყოფილან საერთო წინაპრისა — თარგამოსისა, ნოეს შვილი შვილი - შვილისა. თარგამოსს ბევრი ვაჟები ჰყავდა, უფროსი მათ შორის ჰაოსი იყო სომხების წინაპარი, მეორე — ქართლოსი — ქართველებისა. ამ გენეალოგიას სიტყვა სიტყვით ადასტურებს სომხის ისტორიკოსი მოსე ხორონელი. „ქართლის ცხოვრება“ აგრეთვე გვარწმუნებს, რომ ნაბუქოდონოსორამდე საქართველო.

სომხეთში ლაპარაკობდნენ ერთს საერთო ენაზედ. ეს ხალხური გადმოცემანი, უსათუოდ ამოწმებენ მსოფლიო ისტორიაში არ გავონილ ორი ერის ძმურ ცხოვრებას. შედეგები მისი მრავალფეროვანი იყო. ერთიანობა სარწმუნოების სფეროში (კერპთ თაყვანისცემლობა, ქრისტიანობა), საერთო ზნე-ჩვეულება, ერთდაიგივეობა მრავალ ქართულ-სომხურ სახელებისა, სიტყვებისა; ქართულ-სომხურ არქიტექტურის განსაცვიფრებელი მიმგზავსებანი და სხვა მრავალი. მაგრამ მინდა ამ მხრივაც თქვენი ყურადღება მივაპყრო ერთ თვალსაჩინო პოლიტიკურ მოვლენას: არასდროს გაძლიერება ერთი მხარისა ან და მისი ძალაუფლების გავრცელება მეორეზე არ იწვევდა უკანასკნელში არც შურს და მით უფრო მტრობას. ასეთ მოვლენას ჩვენ ვერ შევხვდებით სხვა ორ ერთა ურთიერთობაში. მაგალითად არშაკიდების ხანაში, რამდენიმე საუკუნის განმავლობაში, საქართველო იმყოფებოდა სომხეთის პროტექტორატის ან ბატონობის ქვეშ და ქართველები ამაში არაფერს ცუდს არ ხედავდნენ. ხშირად თვის რომელიმე მეფის უკმაყოფილო ქართველნი სთვაზობდნენ თავის ტახტს სომხეთის მთავრებს. საშუალო საუკუნოების მეორე ნახევარში კი ჩვენ მოწმენი ვხვდებით პირიქითი ამბებისა.

სომხეთის ბაგრატიდების დასუსტებისა და დაცემის შემდგომ და მონათესავე ქართველ ბაგრატიონების გაძლიერებისას სომხები ხელს უწყობდნენ ქართველ მეფეებს მათი ძალაუფლების სომხების მიწებზე გავრცელებისათვის და როდესაც თამარ მეფის ჯარები მის დროშას სივანის ტბის ნაპირებზე და ერზურუმის სიმაგრეებზე აღმართავდნენ, სომხები არ ფიქრობდნენ, რომ ემსახურებოდნენ უცხო დამპყრობ ერს... თამარ მეფე სომხეთში ისეთივე საყვარელი და პატივსაცემი იყო, როგორც მთელ საქართველოში.

სამწუხაროდ ესლა ჩემს ხელთ არ არის დრო, რომ დაწერილებით მოვიხსნოთ ქართველ-სომხების ძმურ ურთიერთობის კიდევ ბევრი მაგალითები; მაშინ მე გიამბობდით, თუ რამდენჯერ ქართველები და სომხები მხარდამხარ იბრძოდნენ რომაელების, არაბების, სპარსელების, ბიზანტიელების, მონგოლების და სხვა მტერთა წინააღმდეგ, რომლებიც ჩვენი ქვეყნების დამონებას ცდილობდნენ; მე გიამბობდით ერთ ამალელებელ ძველ ჩვეულებაზე, რომლის ძალით მეზობელი ქართველი და სომხის მთავარ თავადნი ერთმანეთს აბარებდნენ დროებით ძუძუმწოვარ ვაჟიშვილებს, რათა დედის რძეს ისინი ძმებად გაეხადა. მე გაგახსენებდით საერთო ქართველ-სომხურ დიდ დღესასწაულებს უძველეს ეკლესიებისა (მცხეთა, ემშიაძინი), რომელზედაც მასიურად ესწრებოდნენ ქართველ-სომხეთა მლოცველნი. და მრავალ სხვა საერთო წმინდა სახსოვარს, საერთო ღირსის და ღზინის მოსაგონარს, მაგრამ ამ ეამად ეს ვიკმაროთ.

ასეთი იყო ორი მეზობელი ერის მრავალ საუკუნოვანი წარ-

სულის საერთო გზა, საერთო ბედი და საერთო ხვედრის შეგნება და მაზედ აღმოცენებული ურთიერთისადმი ძმური და მეგობრული განწყობილება.

მაგრამ ქართველ-სომეხთა მახლობელ დამოკიდებულების მთავარ ფაქტორებად ორი თვალსაჩინო გარემოება გვევლინება. სომეხეთის გეოგრაფიული მდგომარეობა საქართველოს სამხრეთიდან ჰფარავდა. იგი იყო მისი სამხრეთი ზღუდე, სამხრეთიდან მოწოლილ სამტრო ტალღებისაგან დამფარავი. საქართველო კი ამავე დროს იფარავდა სომეხეთს ჩრდილოეთიდან. საქართველომ მრავალჯერ გადაარჩინა სომეხეთი სკითების, ხაზარების და სხვათა ჩრდილო ურდოებისაგან!

გამარჯვებულ მტრის შემოსევების შემდგომ ქართველები და სომეხები ბევრჯერ იფარავდნენ თავს ერთი შეორესთან; მაგრამ უმეტეს შემთხვევაში სომეხები აფარებდნენ თავს საქართველოს, რადგან სამხრეთიდან შემოსევები უფრო ხშირი და სასტიკი იყო, ვიდრე ჩრდილოეთიდან.

ეს ცხადი გაკვეთილები ისტორიისა, ქართველებმა და სომეხებმა დაივიწყეს ამიერ-კავკასიაში რუსეთის ბატონობის დროიდან. რუსეთის ძალაუფლებამ და მისმა *divide et impera*-ს პოლიტიკამ დაანგრია ბუნებრივი ერთობა ქართველ-სომეხებისა და ვერაგულად დაუპირისპირა ერთმანეთს. ეს უბედურება რომ არ ყოფილიყო, რუსეთის რევოლუცია კავკასიაში სულ სხვანაირად დაბოლოვდებოდა. სომეხ-ქართველთა შეერთებული ძალა, შეერთებული სიცოცხლეში და სიკვდილში, გაიტანდა არა მარტო მათ თავისუფლებას, არამედ მთელ კავკასიისასაც.

ძვირფასო თანამემამულენო, არც ეხლაა გვიან დაუბრუნდეთ ჩვენს ძველ ერთობის პოზიციებს. მე საცემით ვიზიარებ თავად ვაჩნაძის აზრებს და მის შეკითხვაზე — ნუ თუ დღესაც, როდესაც კავკასიის თავზე ჭოჩდება შავი ღრუბლები, ქართველები და სომეხები განცალკევებულნი იქნებიან? — ჩვენ ერთად ვუპასუხებთ არა, ამიერიდან ამ განცალკევებას ადგილი აღარ ექნება. და ჩვენი ერთობა დაუპირდაპირდება მხოლოდ კავკასიის დამპყრობელებს. ამ ერთობას, ჩვენი ძველი მეზობლები აზერბეიჯანელები და მთიელნი, რომლებსაც ჩვენთან ერთად ერთი მიზანი აქვთ, ალბათ დიდი თანაგრძნობით დახვდებიან. მათვის ხომ აშკარაა, რომ ქართველ-სომეხთა ერთმანეთისაგან დაშორება იყო ერთი მთავარი მიზეზთაგანი საერთო სამშობლოს — თავისუფალ კავკასიის — დაკარგვისა.

ძვირფასო თანამემამულენო, ამ ჩემი მოკლე ნათქვამიდან და მოყვანილ საბუთებიდან თქვენ დამერწმუნებით, რომ სომეხ-ქართველთა ერთობა არის ერთად-ერთი საწინდარი ჩვენი დაკარგულ და-

მოუკიდებელ სახელმწიფოებრივ ცხოვრების აღდგენისა. და აი ამისათვის აუცილებელია მხარდამხარ მიდგომა და ბრძოლა საერთო მიზნის მიღწევისათვის.

ნებათბოდით გამოვსახო თქვენი გრძნობები და შევსძახო ჩვენს ნათესავ ქართველ ხალხს და მის მშვენიერ სამშობლოს :

გაუმარჯოს ქართველ ერს !

გაუმარჯოს თავისუფალ დამოუკიდებელ საქართველოს !

ს ო მ ხ ე ბ ი და ქ ა რ თ ვ ე ლ ე ბ ი

ამ სათაურით „დამოუკიდებელ საქართველოში“ მოთავსებულია ბ. სამ. ფირცხალავას წერილი, რომელიც აქ მოგვყავს მთლიანად.

ბ. ჯამალიანის სიტყვა, წარმოთქმული სომხ. დამოუკიდებ. დღეს, უეჭველად, მნიშვნელოვანი პოლიტიკური მოვლენაა. იგი სრულს კმაყოფილებას გამოიწვევს ყოველ ქართველში აქ ემიგრაციაში და იქ, საქართველოშიც. დარწმუნებული ვართ, ასეთსავე შთაბეჭდილებას მოახდენს ეს სიტყვა სხვა კავკასიელებზედაც, რომელთაც კარგად აქვთ შეგნებული კავკასიის ერთობის ღირებულება, გულწრფელად მუშაობენ მისთვის და მტკიცედ სწამთ, რომ ადრე იქნება თუ გვიან, ეს ერთობა განხორციელდება. ბ. ჯამალიანის სიტყვას განსაკუთრებული მნიშვნელობა ეძლევა, ნამეტურ კავკასიის პაქტის ხელისმოწერის და გამოქვეყნების შემდეგ.

ჩვენ გვითქვამს და ახლაც განვიმეორებთ, რომ კავკასიელ ერთა შეკავშირებისა და გაერთიანებისათვის არა კმარა მარტო თეორიული პრობაგანდა და კეთილი წადილის დეკლარაცია. საჭიროა, რომ პრაქტიკულ, აგრე ვსთქვათ საქმიან კავშირს წინ უსწრობდეს ფსიქური დაახლოვება ერთმანეთთან, ერთი-მეორის წარსული და აწინდელი სახეობის გაცნობა, ურთერთის გაგება, გარკვევა და გაფანტვა ყველა იმ გაუგებრობისა და უსიამოვნებისა, რომელსაც ადგილი ჰქონდა და აქვს მეზობელ ერთა შორის და აგრეთვე ხაზგასმით აღნიშვნა იმ თანამშრომლობისა და მეგობრობისა, რომელიც იყო წინად.

ყოველს კავკასიელს უნდა ახსოვდეს მუდამ, რომ შეიძლება კავკასია, როგორც პოლიტიკური მცნება, ახალია, ახალია თვით კავკასიის კონფედერაციის იდეაც, მაგრამ არა კავკასიელ ერთა საერთო მოქმედება, საერთო ბრძოლა, შეთანხმებული გამოსვლები, ერთმანეთის დახმარება, კეთილი მეზობლობა. ბ. ჯამალიანმა ყურადღება მიაქცია თავის სიტყვაში სომეხ - ქართველთა მეზობლობას და სამართლიანად ამბობს, რომ ამ ორ ერის ურთიერთობა იშვიათი მოვ-

ლენაა ისტორიაში. სამწუხაროდ დღემდის არ მოგვეპოვება დაღებული ვრცელი გამოკვლევა ამ დამოკიდებულობის, მაგრამ რაც მოგვეპოვება ჩვენს მატთანში, ესეც საკმაო იმის გასაცნობად, თუ რა მჭიდრო კავშირი და ურთიერთობა ჰქონდათ სომხებს და ქართველებს. პირველ საუკუნეებში, როდესაც სომხეთი ძლიერი სახელმწიფო იყო, იგი ხშირად მძლავრობდა საქართველოზე, მაგრამ როგორც უფრო დაწინაურებულმა, დიდი კულტურული დახმარება გავიწვია და იყო პირველი გზა ქრისტიანულ განათლების გასავრცელებლად ჩვენში; შემდეგ როცა მთელ კავკასიაში პირველობა ქართველების ხელში გადავიდა, ქართველები მუდამ დახმარენი და მფარველნი იყვნენ სომხების; სომხეთის დიდი ნაწილიც საქართველოს სამეფო ფარგალში მოექცა, და ეს დრო იყო სომხური კულტურის აყვავების ერთი საუკეთესო ხანათაგანი, პირდაპირ არაჩვეულებრივი სიყვარულით და კეთილგანწყობილებით ეპყრობოდენ ქართველთა მეფეები სომხებს, განსაკუთრებით პატარს სცემდენ სომხის სამღვდლოებას. სხვათა შორის ერთი სომხურ-ქართული ისტორიული დოკუმენტი ასე მოგვითხრობს დავით აღმაშენებელზე: „მას უყვარდა სომეხთა ნათესავი და ეკლესიები და ვინმე რიტორი, მოძღვარი ახბატს, სახელით სარკავაგ, აღუარებდა მას დანაშაულთ და მოუხრიდა რა პატიოსანსა თავსა. ლოცვა - კურთხევას იღებდა მისგან. დაჯდებოდა მასთან და ეხვეოდა კისერზე, იგი კი ეტყოდა: „განრღვეული და აყროლებული ვარ მოხუცებულობისაგან, მომშორდი, რათა არა გადაგედოს სადები“. და მეფე ეხვევოდა და ეტყოდა: „არა მომაკლდეს სიმყრალე ესე, მამაო პატიოსანო“. და მონასტრის მახლობლად უბოძა მას სოფელი მისდა სამსახურად. და როდესაც აკურთხებდა მეფესა, დაადებდა მას ხელს და იტყოდა: „ვპოვე და ვით მონაჲ ჩემი და საცხებელი წმიდაჲ ჩემი ვცხე მას...“ და უხაროდა მეფესა და აქებდა სომხურს მშვენიერს თარგმანს“.

მაგრამ ამასთანავე თვითონ სომხები იშვიათის ერთგულობით და მეგობრობით ეპყრობოდენ საქართველოს და ქართულს საქმეს — მის პოლიტიკურ გაძლიერებას და კულტურულ დაწინაურებას უყურებდენ როგორც საკუთარს საქმეს და ჩვენს ისტორიას მრავალი სომხის გვარი ამშვენებს როგორც სახელმწიფოებრივ ისე საგანმანათლებლო სარბიელზე და ეს გაგრძელდა თითქმის მეცხრამეტე საუკუნის უკანასკნელ მეოთხედამდე, როცა სომეხ - ქართველთა ურთიერთობა ცოტათი აიძვრა. რამდენ სომეხს მოესწრებიათ ჩვენ თვითონ, რომლებიც ღირსეულად მოღვაწეობდენ ქართული საზოგადოებრივობისა, მწერლობისა, თეატრისათვის! იყვნენ სომხები საქართველოს ნამდვილი პატრიოტები!

ქართველებს არასოდეს არ შეგვიძლია ამის დავიწყება, როგორი არანორმალურიც არ უნდა იყოს ხანდახან ჩვენი ერთმანეთთან

დამოკიდებულება. არ უნდა დავივიწყოთ სომხებმა და ქართველებმა ეს განსაკუთრებით დღეს, როცა ჩვენი ქვეყნები უკიდურეს განსაცდელშია, როცა წინ იმდენი საერთო საქმე გვაქვს, როცა თვითულის ჩვენთაგანის ბედი მეორეს ბედზეა გადაჯაჭვული. კავკასიის კავშირი თუ საჭიროა და აუცილებელი, ხომ ცხადია, რომ სომხეთი და საქართველო ამ კავშირის განუკვეთელი და უმთავრესი ელემენტებია და მათი ერთმანეთთან დაახლოვება და ერთობა ნიშნავს თითქმის მთელი კავკასიის შეთანხმებას და ერთობას. სრულებით საჭირო არაა პოლიტიკაში რომანტიკოსები ვიყოთ; სომეხ-ქართველთა მეზობლობაში დღეს არის ზოგირამ უთანხმოება და სადავო. ამას ნუ დავმაღაფთ. ბევრია დაბრკოლება და ხელის შეშლელი გარემოებაც გარეგანი, ჩვენი ბედის გადაწყვეტა მარტო ხომ ჩვენს ხელში არაა. ხოლო ყოველივე დაძლეული იქნება და ყოველი დაბრკოლება გადალახული, თუ აღვიჭურვებით მტკიცე ნებისყოფით და ერთობის ურყევი გადაწყვეტილებით და არასოდეს განვმორღვებით იმის შეგნებას, რომ სომხებს და ქართველებს შეგვეძლო და შეგვიძლია დღესაც ერთმანეთთან თანამშრომლობა, გვქონდა და გვაქვს ერთობის და კავშირის უნარი.

თავში ვთქვით, რომ ბ. ჯამალიანის სიტყვა პოლიტიკური მნიშვნელობის მოვლენაა, ქართველებს გვესმის, კარგად გვესმის სომხების განსაკუთრებული მძიმე მდგომარეობა. კავკასიის გაერთიანება მათვისაც ყოველთვის პრინციპიალურად უდავო იყო, ხოლო მისი განხორციელების მომენტი და სხვა გარემოებანი იწვევდნენ მათში ერთგვარ ყოყმანობას, სიფრთხილეს. საჭიროა საკითხის მეტი მომწიფება, ზოგ მდგომარეობის გარკვევა, შეცვლა; შეიძლება, ეს ყველაფერი ჯერ კიდევ შესრულებული არაა, მაგრამ ბ. ჯამალიანის სიტყვა მოწმობს, რომ ახლოვდება დრო, როცა სომხები მჭიდროდ ამოუდგებიან გვერდში დანარჩენ კავკასიელებს და ყველასთან ერთად გაუძღვებიან საერთო საქმეს — კავკასიის ერების განთავისუფლების და მათი კავშირის დამყარების საქმეს.

ჩვენ—როგორც ძველი გულითადი მეგობარი სომხებისა—სრული სიხარულით ვეგებებით ამ დღის მოახლოვებას.

(დამ. საქ. № 106).

ქართველი ერი, როგორც მშენებელი

(ეკონომიური ეტიუდი *)

ასეთი იყო ძველად და შემდეგშიც ქართველი ხალხის მონაწილეობა ადგილობრივ მრეწველობაში. კვლავ იბადება კითხვა: თუ შორეულს დროიდან ვხედებით საქართველოში დამზადებულს საქონელს, ნუ თუ ჩვენს ხანაში ველარ მოახერხებდა ჩვენი ერი მრეწველობის გაჩენას, მის მშენობლობაში თავის გამოჩენას? როგორც სასოფლო-მეურნეობის დარგებისთვის აღვნიშნეთ, რასაკვირველია, აქაც, საჭირო იყო მრეწველობის გაჩენაშიც. ამისათვის უტყუარად მოცემულია ყველა ობიექტიური პირობები. მაგრამ საქართველოს პოლიტიკური და მასთან მჭიდროთ დაკავშირებული სხვა პირობანი და გარემოებანი ხელს ვერ უწყობდენ ქართველ ერს თვისი ეროვნული მეურნეობა ამ მხრივაც გაეძლიერებინა.

როდესაც უარყოფითი პოლიტიკურ ვითარებებზედ ვლაპარაკობთ, ჩვენ ის კი არ უნდა ვიფიქროთ, თითქოს რუსეთის მმართველობას, რაიმე „უკაზით“ გამოეცხადებინოს, რომ ქართველ ხალხს ეკრძალებოდა სასოფლო-მეურნეობის და საქალაქო მრეწველობის გაუმჯობესობა. ამ გვარი „უკაზის“ გამოცემა მათ არც სჭირდებოდათ, რადგან საქართველოს ძირითად ინტერესებისადმი მტრულად განწყობილ რუსეთის მმართველობას ბევრი სხვა საშუალებებიც ჰქონდა, რათა ეკონომიურათაც შეევიწროებინა ჩვენი ერი. სახელმწიფოს თვისი ეკონომიური, ადმინისტრატიული, თუ სოციალურის პოლიტიკით ყოველთვის შეუძლიან ერის კეთილდღეობის აწევაც და დაცემაც. — საბაჟო და საგარეო პოლიტიკა, გადასახადების გაწერა, რკინის გზების გაყვანა, სხვა გზების გაუმჯობესობა, კრედიტის მოწყობა, სწავლა-განათლების, როგორც საზოგადოსი ისე საპეციალურის, გავრცელება. ეკონომიური მოვლენათა შესწავლა-შეფასება, კრიზისების დასაძლევად საჭირო ზომების მიღება და სხვა ამგვარი. აი ის საშუალებანი რომლითაც რუსეთის მმართველობას ადვილად შეეძლო ჩვენი ქვეყნის გამდიდრებაც და გაღარიბებაც! საკმაო არის ის დრაკონული ღონისძიებანი გავიხსენოთ, რომელიც შემოღებული იყო ქართული მარგანეცის ექსპორტის დასაცემად — სატარიფო პოლიტიკით!.. ამისთანა ხერხებით ხდებოდა, რომ სრულებით მივიწყებული და მიგდებული იყო საქართველოს უამრავი ბუნებრივი სიმდიდრენი, — ლითონი იყო, თუ ნავთი, წყლის ძალა თუ სხვა. საქართველოს სამთო-მადნო მრეწველობას და ქართველი ერის ამ დარგის მშე-

*) იხ. ჟურნალი „სამშობლო“ № 15.

ნებლობაში მონაწილეობას ძველთაგან ქონდა მოპოებული უცხო ქვე-
 ცნებშიც დიდი სახელი...

თუ რამდენად იყო მავნებელი საქართველოსათვის რუსეთის პო-
 ლიტკა, ამას შემდეგი ორი ციფრი გვიჩვენებს. 1913 წელს ეროვ-
 ნული შემოსავალი თითო სულზედ, მთელს რუსეთის იმპერიაში შე-
 ადგენდა 101 მან. 35 კაპ. ეს ეროვნული შემოსავალი საქართველო-
 ში-კი მხოლოდ 95 მან. 58 კაპ. იყო. აქ ვერ შეუდგებით ამ მასალის
 უფრო დეტალურად შესწავლას. ვიტყვით მხოლოდ, ეროვნული შე-
 მოსავლის ის წილი, რომელიც მრეწველობაზედ მოდის, რუსეთისა-
 თვის უფრო დიდია ვიდრე საქართველოსათვის, გასაგებ მიზეზების
 გამო. სამაგიეროდ, ის შემოსავალი, რომელიც სასოფლო-მეურნეო-
 ბის წილს შეადგენს, ჩვენში უფრო დიდია, ვიდრე რუსეთში, რად-
 გან ჩვენებური სასოფლო კულტურა უფრო მრავალფეროვანია, ინ-
 ტენსიური არის. ჩვენი ეკონომიური ძალები აქაც დაჩაგრული იყო,
 მაგრამ რუსეთის პოლიტიკა აბა რას უზამდა საქართველოს ჰავას,
 ნაიდავის ბუნებრივ სიმდიდრეს, ჩვენი ქვეყნის გეოგრაფიულ მდგო-
 მარეობას...

ქართველს ერს, მტერნი თუ მოყვარენი, ხშირად უკიჟინებდენ:
 თუ სასოფლო-მეურნეობაში მაგისტანა გამჭრიახი და მცოდნე ყო-
 ფილხართ წინეთ და დღესაც ვითომდა ხართ, იმდენი პურის მოყ-
 ვანა მაინც როგორ ვერ მოგიხერხებიათ, რომ სხვა ქვეყნებიდან არ
 გიხდებოდესთ საქირო საკვების შემოტანაო?

მართლაც და რაშია საქმე?! თვით ბოლშევიკური ეკონომისტე-
 ბიც ამბობენ, საქმათა ათი პროცენტით აიწიოს პურის მოსავალმა,
 რომ საქართველოს აღარ დასჭირდეს უცხოეთში პურის სყიდვაო.

ჩვენს სამშობლოში ამას წინათ ასეთი ცდებიც-კი მოუხდენიათ:
 ხენა - თესვის არსებული წესების შეუცვლელად, უცდიათ ზოგიერთ
 ადგილებში, სასოფლო-მეურნეობაში ხმარებული ყველა მანი-
 პულიაციები, უფრო მეტის გულმოდგინებით და ყურადღებით მო-
 ეხდინათ. მაგალითად, სადაც საქირო იყო უფრო ღრმად მოხნეს,
 თესლი კარგად გასწმინდეს, დათესილ მიწებს თვალ-ყურს ადევ-
 ნებდენ და უპატრონებდენ და სხვა ამ ხასიათის ზომებს ღებულო-
 ბდენ. და წარმოდგინეთ, ასეთმა პრიმიტიულმა გაუმჯობესებამაც
 კი შედეგად ის მოიტანა, რომ მოსავალი დესეტინაზედ 90 ფუთი
 მოვიდა, მაგიერ ჩვეულებრივის 50 ფუთისა! ამისთანა მოსავლითო,
 გემტკიცებენ ბოლშევიკები, იმოდენა პური დაგროვდებოდა, რომ
 საკვებათაც გვეყოფოდა და გარეთ გასატანადაც დაგვრჩებოდაო!
 უეჭველია, ვიტყვით ჩვენ, რომ ქართველ მეურნეს რაღაც თავისი-
 ვარიში ქონია, რომ არაცდილა, ასეთი იოლი საშუალებებით მოსა-
 ვალი 90 ფუთამდე აეყვანა.

დღეს, საერთოდ უძნელეს კრიზისის დამყარების ხანაში, უკვე ყველამ სცნა, რომ ყოფილა მდგომარეობა, როდესაც, მაგალითად, დიდი მოსავლის დაგროვება სოფლის მეურნესათვის ყოველთვის არ ყოფილა დიდი ბედნიერება. ყოველ დღე ვტყობილობთ, რომ ორთავე ამერიკაში, ავსტრალიაში და სხვა მხარეებშიც პურის, კარტოფილის, ყავის და სხვათა მოსავალს, ნაწილს წყალში ყრიან, სწვავენ, აოხრებენ! ამ ეამად შეერთებულს შტატებში მთავრობას გადაუწყვეტია, კრედიტით იმ გაჭირებულ ფერმერებს გაუმართოს: ხელი, ვინც სიტყვას მისცემს, რომ ნაკლებს დასთეს...

იქნებ ამ ამბებმა ჩვენ, ქართველებიც, ჩაგვაფიქროს და ჩვენი სოფლის მეურნის ანგარიშს მიგვახვედროს, და გავვიშუქოს უცნაურობა, თუ რატომ არ ცდილა ქართველი მშრომელი 50 ფუტის მაგიერ — 90 ფუთი მოეყვანა.

ბატონ-ყმობის გადავარდნის შემდეგ, მეტადრე მაშინ, როდესაც გაყვანილი იყო ფოთი - ტფილისის რკინის გზა, შავს ზღვაზედ ნავოსნობა გაჩნდა, კავკავ - საქართველოს გზატკეცილზედ საქონლის გაზვირებული გადაზიდვ - გადმოზიდვა გაჩაღდა, საქართველოს სასოფლო - მეურნეობის ეკონომიური პირობებიც ძირითადათ, იცვალა. საქართველოში შემოიჭრა **იაფი რუსეთის პური** და **სწორეთ ამან** თან და თან, რადიკალურად შესცვალა ჩვენი ქვეყნის სამინდვრო, ე. ი. პურის მოყვანის პოლიტიკა. რუსეთის უფრო იაფმა პურმა დასცა ჩვენი, ადგილობრივი პურის ფასები. რუსეთის პური, რკინის გზით მოტანილი, მოზღვევა ჩვენს ქალაქ ადგილებში და აქედან ფეხი გაიდგა სწორეთ იქით, სადაც კარგი გზები იყო გაყვანილი. ჩვენს სოფლებში-კი რუსეთის პური ვერ გაუწევდა დიდს კონკურენციას ჩვენებურს, რადგან ცუდს სოფლის გზებზედ, უხილთ დატოვებულ მდინარეებზედ მისი გადატანა აძვირებდა უცხოეთის პურის ფასსა. რკინის გზები ჩვენი სოფლებისაკენ რომ ყოფილიყო გაყვანილი, პურის უხალისოდ მოყვანა უფრო მძლავრად იჩენდა თავსა. იაფი რუსეთის პური მხოლოდ ადვილად მოსავალ ადგილებში სალდებოდა და სალდება დღესაც. ამიტომაც, რომ ჩვენი გლეხი ცდილობს სწორედ იმდენი პური მოიყვანოს, რაც მის კერძო მოთხოვნილებას აკმაყოფილებს. ფართე ბაზარზედ ჩვენი პურის გატანა აღარ ივარგებდა, რადგან იქ მას უცხოელი უფრო იაფი პური უჩალებდა კონკურენციას. თუ ამასთანავე გავიხსენებთ რუსეთის მოხერხებულ სატარიფო პოლიტიკის მძინებარეობას, აშკარად დავინახავთ თუ რამდენად ძმელი იყო ქართველი მეურნისათვის ფართე მაშტაბით საბაზრო და საექსპორტო პურის მოყვანა.

თვისი სატარიფო პოლიტიკით რუსეთის მთავრობამ ციმბირის პურის დაჩაგვრაც-კი მოახერხა, შიდა რუსეთის, ველიკოროსულ. პურის სახეიროთ და აბა ჩვენ, ქართველებს, რალა ხეირს დაგვაყ-



რიდენ. ჩვენში გზების უვარვისობა, ხომ სწორედ, საარაკოა : არც რკინის გზების ფართე ბადე, არც ხეირიანი „ფოსტის“ თუ სასოფლო გზები. რუსეთში ამ მხრივ, შედარებით ჩვენთან, საქმე უფრო რიგზედ არის მოწყობილი. იმის საჩვენებლად, თუ რა გავლენას ახდენს საქონლის ფასებზედ ამა თუ იმ ხასიათის გზები მოვიყვანთ, ორიოდე მაგალითს : პურის ურმებით გადაზიდვა კარგად ვაკეთებულს სასოფლო გზებზედ ორიდან — რვაჯერ უფრო იაფად ჯდება. საშუალოდ მომარაგებულს შოსესე გზაზედ 3-4 ჯერ; კარგს შოსეზედ 4-ჯერ. ავტომობილით გადაზიდვა აიაფებს გადაზიდვას რვაჯერ და მეტადაც! სად არის ჩვენში ამისთანა გზები?! როდის იზრუნა რუსის მთავრობამ ჩვენშიც გაეჩინა ამისთანა ეკონომიური არტერები?

სხვა პირობებს რომ თავი დავანებოთ, ჯერ ამ გარემოებით უხდებოდათ რუსებს თვისი პურის უფრო ხეირიანი ფასებში გასაღება, ვიდრე ჩვენ. დაუმატეთ ამას ისიც, რომ ჩვენ მთიან ადგილებში გვიხდება ხვნა - თესვა, კამბეჩ-ხარებით შემზულ გუთნებით, მაშინ როდესა რუსეთის სტეპები ცხენის გუთანს ამუშავენ და ეს გუთანი, უმეტესად, რკინისაა, იქ მათი ერობათა და მთავრობის ზრუნვით გავრცელებული.

გამოანგარიშებულია, რომ ხარებით მოხნულ მიწებზე პური ჯდება ფუთი 85 კაპ., ცხენის გუთნებით-კი 35 კაპეიკი! რაც შეეხება ერობისა და მთავრობის ზრუნვას სასოფლო-მეურნეობისათვის, აქ ხომ საქართველო სულ მივიწყებული იყო. აი რამდენიმე საყურადღებო ციფრები.

ყოველ 1000 ჰექტარ კულტურულ მიწებზედ ხარჯავდენ :	
შეერთებული შტატები	700 მან.
ი ნ გ ლ ი ს ი	1070 „
ს ა ფ რ ა ნ გ ე თ ი	600 „
რუსეთი, ომის წინ (ევროპის რუსეთი)	300 „
საბჭოთა რუსეთი, იქვე	120 „

საქართველოსათვის-კი ან არაფერს იმეტებდენ, ან რატაც კაკაპეიკებს!

იძლებული ვარ სიტყვა აღარ გავაგრძელო, თუმცა სათქმელი კიდევ ბევრია იმის გამოსაშკარავებლად თუ რამ აიძულა ჩვენი მეურნე, არსებული პირობებში აღარ ცდილიყო პურის იმაზედ მეტის მოყვანას, რაც ეხლა მოყავს.

და საქართველო არ იყო განცალკავებული ამ შემთხვევაში. ერთ დროს ამნაირევე მდგომარეობა დაუდგა მთელ რიგ ევროპიულ სახელმწიფოთ, როგორიც არის სკანდინავიის ქვეყნები, დანიიდან და-

წყებული; ჰოლანდია, ბელგია; მთელი წყება დიდი სახელმწიფოებისაც ჩავარდა დიდი კრახის ხანაში. ეს მოხდა წარსული საუკუნის 70-ან წლებში, როდესაც ფართეთ მოწყობილმა და ახლად შემოღებულმა საორთქლო იაფმა ტრანსპორტმა, ამ ქვეყნებს მიაყარა იაფი ამერიკის და რუსეთის პური. ჩვენის რწმენით, სწორეთ ამ წლებიდან იწყობა საქართველოს ეკონომიური კრიზისიც და იმავე მიზეზებით, რომელიც იქ, უცხო სახელმწიფოებში, მეფობდენ. აქ ვერ გამოვუდგებით იმ კრიზისის დეტალურად აღწერას, თუმცა იგი ღირსია ჩვენი ყურადღებისა, რათა უკეთესად ჩავხედეთ ჩვენი ერის წარსულს და აწყო გაკირვებათა. ვიტყვით მხოლოდ, რომ ის დიდი კრიზისი ევროპაში ყველგან დაძლეული იყო, ძლეული იყო სულ პირველად სახელმწიფოს ჩარევით და შველით. ამ მხსნელმა მიშველება იქ ისეთი ბედნიერი მდგომარეობა შექმნა, რომ ამერიკის და რუსეთის იაფი პურის შეჭრა სასარგებლო და სახირო გახდა იმ ქვეყნებისათვის, რადგან დროზედ მოხდა სამეურნეო სისტემების შეცვლა თანახმად ახლად შექმნილ პირობებისა. ამ ბრძოლიდან მაგალითად, დანია უფრო ძლიერი და გამდიდრებული გამოვიდა, ვიდრე იყო მაშინ, როდესაც პურეულის თესვას ხარბათ მისდევდა.

თითქოს ამაზედ იყო ნათქვამი : „ზოგი ჭირი მარგებელია“—ო. მართალია, დანიაშეამცირა ის ფართობი, რომელზედაც წინათ პურსა სთესდა, მაგრამ სწორედ მეურნეობის შეცვლილი სისტემის წყალობით, ამ უფრო მცირე ფართობზედ, წინანდელზედ მეტი მოსავლის აღება მოახერხა, რომელიც თვითონაც ყოფნიდა და გარეთაც გაქონდა, თუმცა ეს ექსპორტი მას იმდონად აღარ აინტერესებდა...

იმ დიდი კრიზისისაგან, რომელიც ჩვენს სამშობლოს დღეს ადგია, იგი დიდი ხანი გამოვიდოდა, მისთვის მზრუნველი მთავრობა რომ ყოლოდა მას. ამისი თავმდებია, როგორც სხვა ქვეყნების მაგალითები, ასე ჩვენი ერის ძველი კულტურის ისტორია. ამისთანა მთავრობა მიაწოდებდა ქართველ ხალხს საჭირო ხელმძღვანელობას, რათა სასოფლო-მეურნეობაც აყვავებულიყო და საქალაქო მრეწველობაც. რუსეთის თვითმპყრობელობის დროს, ტფილისში, რუსთ მოხელეთა მალალ წრეებშიდ ხშირად გაიგონებდით ჩვენს ხალხზედ ასეთ ზერელე მსჯელობას : „ავსუსი არ არის, რომ ეს მდიდარი ქვეყანა, ისეთი ჩამორჩენილი და უკულტურო მოსახლეობის ხელშია, როგორც ქართველები; გერმანელები, ინგლისელები და ამერიკელები მას სამოთხეთ გადააქცევდენო?“. ზოგი ქართველი ამასვე თუთიყუშით იმეორებდა ამ ჩვენ დამცინავ სიტყვებსა.

ასეთი დაცინვები დღესაც არ გვაკლია. ერთ რუს-ემიგრანტულს ყრილობაზედ, პარიზში, ამ რამოდენიმე წლის წინად გამოვიდა ვინმე ორატორი (მგონი მას სრულიად რუსეთის დამფუძნებელ კრების პრეზიდენტში საპატიო ალაგი ელოდა), და კბილების უშნო კრეჭით

ქართველებს ასე დაგვცინა: „საქართველოს მთელი ეკონომიური სიძლიერე იმაში გამოიხატებოდაო, რომ მას მხოლოდ ერთად-ერთი საქსპორტო საქონელი ებადა და ისიც — რემინგტონის საწერი მანქანა იყოო“. არც ჩვენ მოგვაქვს თავი ჩვენი ყოველწლიური ექსპორტით, რომელიც ომის წინ, საშუალოდ, 42 მილიონ მანეთამდე აღიოდა. ამ ექსპორტს შეადგენდა ოციოდე (20) სხვადასხვა გვარის საქონელი. მართალია, იმ სიაში რემინგტონის მანქანას არ ქონია ალაგი, მაგრამ სამაგიეროდ, რაც იქ შედიოდა, ყველა ეს საქართველოს მკვიდრ შვილთა მარჯვნივ და ოფლით იყო მოყვანილი და მობოვებული. დადგება დრო, საქართველოს კვლავ გაუჩნდება მისთვის მზრუნავი მშობლიური მართველობა და სწორედ ამითი მიეცემა ჩვენს ერს აუცილებელი პირობები, ექსპორტიც იმ სიმაღლეზე აიყვანოს, როგორც ეს საქართველოს უხვს და მდიდარ ბუნებას შეეფერება. მაგრამ, ჩვენი ექსპორტის დღევანდელ დონის შესახებ აი რა გვაქვს სათქმლი. ომის წინ თვით რუსეთის ექსპორტი, თითო სულზედ ნაანგარიშევი, მოდიოდა საშუალოდ, წლიურად, ათ მანეთზედ ნაკლები. საქართველოსი-კი იგი იყო 17 მან. და 50 კაპ.

ამაზეა ნათქვამი: „ისეთმა ფურმა დამწიხლოს, ჩემზედ მეტს რომ იწველიდეს“-ო.

ამ ყამად რომელიმე პოლიტიკურ-ეკონომიური სახელმძღვანელო რომ დაათვალიეროთ, იქ აუცილებლად, ასეთ ჭეშმარიტ დებულებას, აქსიომად გადაქცეულს, ამოიკითხავთ; „რა გინდ მდიდარი იყოს რომელიმე ქვეყანა, თვისი ბუნებრივი პირობებით, რა გინდ გამჭრიახი და კულტურული მოსახლეობა ყავდეს მას, რა რივი წინასწარ მოცემული მატერიალური პირობებით იყოს იგი აღჭურვილი, — იმ ქვეყნის ეკონომიურად უფრო მაღალს და მძლავრს საფეხურზედ ასვლა, მისი მეურნეობის ევოლუცია, ვერ მოხერხდება, თუ ამისათვის, სულ პირველად თვით სახელმწიფოსაგან, ხელისუფლებისაგან, არ იქმნა მიღებული სათანადო და წინასწარი ზომები“.

როდესაც უცხოეთიდან იაფი პური შეიჭრა სკანდინავიის ქვეყნებში, ჰოლნდიასა თუ ბელგიაში, იქ ამით გამოწვეულ კრიზისის დასაძლევათ, როგორც ავღნიშნეთ, მოსახლეობას მშველელად და ხელმძღვანელად სახელმწიფო აპარატი გამოუჩნდა. აი ასეთი სახელმწიფოებრივი აპარატის შევლა და აკლია დღესაც საქართველოსა და, ამიტომაც ფერხდება ჩვენი სასოფლო-მეურნეობის და ქალაქურ-მრეწველობის განვითარებაც.

საქართველოს დამოუკიდებლობის ძიება არ არის რალაც განყენებული, ფილოსოფიური მცნება; მით უფრო, იგი არ არის უსაქმურ ინტელიგენტების მიერ მოგონილი ფანტაზია, როგორც ამას ჩვენი მტრები გაიძახიან. ჩვენი დამოუკიდებლობა სწორედ იმისთვი-

საცაა საჭირო, რომ ქართველი ერი გამოვიდეს იმ უკიდურეს ეკონომიურ დაქვეითებისაგან, რომელიც მას ძალათა აქვს თავზედ მოხვეული.

საქართველოს დამოუკიდებლობა არის ჩვენი ერის პოლიტიკური ხსნა და მასთან ერთად ეკონომიური განთავისუფლებაც. იგი, და მხოლოდ იგი მიანიჭებს ჩვენს ერს იმ მატერიალურს საშვალეებს, რომელიც საფუძვლად დაედება ჩვენი სამშობლოს წინ სვლას, მისი კულტურულ აღორძინებას.

გიორგი ურუული.

ქ. პარიზი.

ქ ა რ თ ი ვ ე ლ ე ბ ი

საბჭოთა მწერლობის ჟრილოზაჟი მოსკოვში

ამა წლის მარიაშობისთვეში, მოსკოვში მოხდა საბჭოთა მწერლების ყრილობა. საბჭოთა საქართველოს მხრივ ამ ყრილობას დაესწრნენ: მ. ჯავახიშვილი, მ. ტოროშელიძე, პ. იაშვილი და ს. ეული. მოსკოვის გაზეთებმა ვრცლად დაბეჭდეს მათი სიტყვები და მოხსენებები. მოგვყავს ზოგი ერთი დამახასიათებელი ადგილები მ. ჯავახიშვილის და მ. ტოროშელიძის მოხსენებებიდან დაბეჭდილი „იზვესტია“-ში, 23 აზვის. № 197.

მ. ჯავახიშვილი. — „სტილი „სოვეტიკ“ უკვე არსებობს—ეს უდავო ფაქტია, მთელ ბურჟუაზიულ ქვეყნიერობის მიერ ცნობილი. მართალია ჩვენ უკვე მივალწიეთ წინ მსვლელობაში საგრძნობ სიმალეებს, მაგრამ მწვერვალისაგან ჯერ კიდევ შორსა ვართ. ჩვენ ჯერ არ მოგვეპოვება საბჭოთა პუშკინი, ტოლსტოი, რუსთაველი, ბალზაჟი, შექსპირი...

თუ კაპიტალისტურ ქვეყნების ლიტერატურას ეტყობა დაბერება, მოქანცვა და ცხოველ იდეების ნაკლებობა, ჩვენში, პირიქით, ეს იდეები ისეთ გადამეტებულ დოზებად გვეძლევა, რომ მხატვრულ ნაწარმოები უბრალო „აგიტაკ“ იქცევა. ჩვენი მკითხველისათვის მიუღებელია პუბლიცისტური ტენდენციებით გატენილი ლიტერატურული ნაწარმოებნი.

აქა იქ გაისმის ხმები აგრძალულ თემების შესახებ; ჩემის აზრით

საჭიროა ყველაფერზე იწერებოდეს: სიყვარულზე, ოჯახზე, ამ-
 შენებლობაზე, წარსულზე, აწმყოზე, მომავალზე. მაგრამ თავდაპირ-
 ველად უნდა იწერებოდეს—სიმართლიდ, გულწრფელად და მასალის
 სრულის ცოდნითა.

საბჭოთა კავშირის ერების ლიტერატურა, კერძოდ ქართული,
 რუსულ ენაზე გადათარგმნილი, სტილის მხრივ, ყველაზე უფრო
 ბევრად აგებს. ეს აიხსნება იმით, რომ არც ერთმა რუსმა ლიტერა-
 ტორმა არ იცოდა და არ იცის ქართული ენა, მაშინ როდესაც
 ჩვენს ენას სწავლობდნენ და განაგრძობენ სწავლას მრავალი ევრო-
 პიელნი. ჩვენი ჩრდილოეთის თანამოძმეები მოკლებულნი ცნობის
 მოყვარობას, გვაიძულებენ ჩვენ ქართველებს ჩვენივე ნაწარ-
 მოებნი ვთარგმნოთ რუსულად. და რადგანაც რუსულ ენას ხეირი-
 ნად არ ვიცნობთ, ეს თარგმანები ძალიან სუსტნი გამოდიან...

ამ დღეებში ჩვენ გვაცნობეს, რომ უცხო ენებზე 1064 წიგნი სა-
 ბჭოთა ავტორებისა გამოვიდა. არ ვიცი მათ შორის რამდენი წიგნია
 არა რუს ავტორებისა, მაგრამ კი ვიცი, რომ მათს რიგში არ მოიპო-
 ვება არც ერთი ქართული წიგნი... და ეს აიხსნება, რასაკვირველია,
 არა ცუდი ხარისხით თანამედროვე ქართული ლიტერატურისა.

ქართულ ლიტერატურის ისტორიაზე, მოხსენებას აკეთებს მ.
 ტოროშელიძე (კომუნისტი) და გზა და გზა აფასებს გუშინდელ და
 დღევანდელ ქართველ მწერლებსა.

მ. ტოროშელიძე. — „ქართული ლიტერატურა აღმოსავლეთში
 ერთი უძველესი ლიტერატურაა; თითქმის 15 საუკუნის მანძილზე
 საქართველოს აქვს საკუთარი შეუწყვეტელი ლიტერატურული ტრა-
 დიცია. თავისი მნიშვნელობით და დიპაზონით ძველი ქართული
 ლიტერატურა არაფრიდ არ უთმობს არც ერთ სხვა ლიტერატურას,
 საშუალო საუკუნოებისა. უმაღლესი მისი გამომსახველი არის **შოთა
 რუსთაველის** „ვეფხვის ტყაოსანი“ — ეს ერთი უდიდესი ძეგლთაგანი
 მსოფლიო ლიტერატურისას. წარმოდგენა აქ მთელი სურათის, მდი-
 დარ ძველ ქართულ ლიტერატურისა, ძალიან რთული ამოცანაა“.

მე-17 - 18 საუკუნოებსა ლიტერატურულ ეტაპების მცირე გან-
 მარტების შემდეგ ბ. მ. ტოროშელიძე ჩერდება მე-19 საუკუნეზე და
 მის ლიტერატურულ ცხოვრების უკანასკნელ გამოჩენილ გამომსა-
 ხველზე **ილია ჭავჭავაძეზე**:

მე-19 საუკუნის მე-60 წლებს აქვს განსაკუთრებული მნიშვნე-
 ლობა ქართველ ხალხის ცხოვრებაში და ქართულ ლიტერატურაში.
 ყველაზე დიდ ყურადღებას ამ ხანის მწერალთა შორის იქცევა **ილია
 ჭავჭავაძე**. თავისი პოეტური და პუბლიცისტური ნაწარმოებით იგი
 დიდ გავლენას ახდენს ქართულ ლიტერატურაზე ჩვენს დღეებამდის.

ქვეყანაში ნაციონალისტთა და დგას ოპოზიციაში მთავრობასთან. მისი პოეზიის მთავარი ზოლი—ეროვნული ჰანგია. აკაკი წერეთელთან ერთად, იგი აარსებს იმ ქართულ ნაციონალიზმს, რომლითაც გამსჭვალულია მთელი ქართული ლიტერატურა.

მგონს ვაჟა ფშაველას — მეტად ორიგინალურ მწერალს ქართულს ლიტერატურაში — ეჯავრება ცარიზმიც და კაპიტალიზმიც, ორივე ერთად. პირველი, როგორც საქართველოს დამპყრობი, მეორე — როგორც მისი ხალხის ძველ ტრადიციების და ეროვნულ საზღვრების დამრღვევი“...

დღევანდელ მწერლობაში მ. ტოროშელიძე, განსაკუთრებულ ადგილს მ. ჯავახიშვილს უთმობს :

..მ. ჯავახიშვილი — ამბობს ბ. ტოროშელიძე—მნიშვნელოვანი ფიგურაა ქართულ საბჭოთა ლიტერატურის ასპარეზზე. იგი განაღდა ქართულ ლიტერატურის ჰორიზონტზე, ოქტომბრის რევოლუციის 15 წლის წინად და მიიქცია ყურადღება თავის ჰუმანიურ - ლიბერალურ მიმართულებით, მაგრამ მ. ჯავახიშვილი სტოვეებს ლიტერატურულ სცენას და უბრუნდება მას პროლეტარულ რევოლუციის პირობებში. მისმა „ჯაყოს ხიზნებმა“ დიდი რეზონანსი ჰპოვა საზოგადოებაში. მართალია, ამ რომანში ავტორმა ძალიან დაამახინჯა რევოლუციის სინამდვილის პროცესი, მაგრამ „ჯაყოს ხიზნებში“ ისეთი სიძლიერით ნაჩვენებია უნიათობა, სიუძღურე, რევოლუციით დაშინებულ ქართველი ინტელიგენციის, როგორც თანამედროვე ქართულ საზოგადოებრივი ტიპისა, რომ თავის დროზედ ამ რომანმა ავტორს „რევოლუციის თანამგზავრის“ რეპუტაცია მიანიჭა. შემდეგში, კლასთა მწვავე შეჯახების პირობებში, ჩვენი რევოლუციის რეკონსტრუქციის პერიოდში, მ. ჯავახიშვილი გადადის მემარჯვენე ბანაკში და იჭერს მნიშვნელოვან ადგილს ანტიპროლეტარულ მწერალთა რიგში; 1926 - 1928 წ.წ. მ. ჯავახიშვილი უდგება სათავეში „არფიონი“-ის მწერალთა კავშირს, რომელშიაც შედიოდნენ : შალვა დადიანი, ს. შანშიაშვილი, ლ. ქიაჩელი, გ. ქიქოძე, კ. ჭიჭინაძე, დ. სულიაშვილი, ი. მოსაშვილი, ლ. მეტრეველი, კ. კაპანელი და სხვა. მ. ჯავახიშვილს მოელოდებოდა საფრთხე ბურჟუაზიულ მწერლად გახდომისა. მაგრამ მწერალმა დროზე შეიგნო თუ საითკენ მიაქანებდა ამ მიმართულების ლოლიკა და 2 - 3 წლის სიჩუმის შემდეგ დაიწყო ბეჭდვა თავის ცნობილ „არსენა მარაბდელისა“. ამ რომანმა დაგვიდასტურა, რომ ავტორი დაადგა გადახალისების გზას და მიუახლოვდა იდეურად პროლეტარულ პოზიციებს...

ძლიერი გავლენა რევოლუციამ მოახდინა, აგრეთვე მწერალ ნიკო ლორთქიფანიძეზე — მე-20-ე საუკუნის ქართულ მხატვრულ პოეზიის ამ გამოჩენილ წარმომადგენელზე...

ქართველ პროლეტარულ პოეზიის ზრდა ბ. ტოროშელიძის ჩვენებით — უმთავრესად ახალ ძლიერ ძალებს ეყრდნობა, როგორც არიან : ა. მაშაშვილი, კ. ლორთქიფანიძე, კ. კალაძე, პ. ჩხიკვაძე, პ. ნაროშვილი, ბ. ჩხეიძე, ე. პოლუმორდვინოვი, ი. აბაშიძე, გ. კაჭახიძე, ა. გომიაშვილი, კ. ბობოხიძე, ი. ვაკელი, კ. სამსონიძე და სხვ.

მაგრამ ბ. ტოროშელიძე, სამწუხაროდ არ ჩამოთვლის ამ „ახალ ძლიერ ძალების“ ნამუშევარს, ვარდა პ. სამსონიძის — „სალტესი“ (კოლხოზურ ცხოვრებიდან)... ალბათ ჯერ კიდევ სწერენ... დასასრულს ბ. ტოროშელიძე მწუხარებას დასძენს :

„მიუხედავად ამ ორი წლის განმავლობაში დაწერილ მთელ რიგ ნიჭიერ ნაწარმოებისა (?) უნდა გამოვტყდეთ, რომ ქართულმა ლიტერატურამ ჯერ კიდევ არ მოგვცა სრულ წონიანი, მთლიანი ნაწარმოები, რომელიც მთელს ჩვენს სინამდვილეს გამოხატავდეს“...

ჩვენის რწმენით, დღევანდელ ქართულ სინამდვილის მთლიანი გამოხატველი, რომელსაც უნეტარის ბ. მ. ტოროშელიძე — გაჩნდება მაშინ, როდესაც საქართველო დამსხვრევს მოსკოვის ბორკილებს და ქართველი ხალხი განთავისუფლება რუს მუყიკების მიერ დაწესებულ ჩვენში მხეცური რეჟიმისაგან.

ქართველი მწერალი.

ქართული წარმოდგენა

მ მოემბერს, პარიზში დადგმულ იქმნა დ. ერისთავის ცნობილი პიესა „სამშობლო““. ეს მესამე წარმოდგენაა, რომელიც ბ. შალვა ნებიერიძემ ვამართა პარიზში, სცენის მოყვარეთა ძალებით—(პატარა კახი, ლალატი, სამშობლო). ყველასთვის ნათელი უნდა იყოს ამ საუკეთესო პატრიოტულ ზეიხების დადგმის მნიშვნელობა ემიგრაციაში, სადაც ბლომად მოიპოვებიან ისეთი ახალგაზდანი, რომელნიც უცხო მიწა-წყალზე აღიზარდენ და ქართული სცენა არასოდეს უნახავთ.

სცენის მოყვარეთა წრეს და მის ხელმძღვანელს ყოვლად აუტანელს პირობებში უხედბათ ამ საქმის წარმოება. ქართულ ემიგრაციის უღარესად დაძაბუნებისა და დაშლილობის გამო, ამ საქმეს ვერცერთი წრე, ვერც ერთი დაწესებულება ვერ უწყევს რაიმე დახმარებას და სასცნო საქმ ზომ ნორმალურად დაწყობილ ქვეყნებშიც ვერ ხეირობს, თუ მას მუდმივი დახმარება არ აქვს სახელმწიფო

თუ სხვა წყაროებიდან. „სამშობლო“ დადგმულ იქმნა ისეთი სცენაზე, რომლის სივრცე სამს ადღს არ აღემატებოდა. მიუხედავად ამისა საზოგადოება ფრიად კმაყოფილი დარჩა წარმოდგენით. მსახიობებსა და რეჟისორს დიდი მუშაობა გაუწევიათ პიესის დამზადებისათვის და ასეთს გაუტეხელს მუყაითობას, რომ საზოგადოების დახმარებაც მიმატებოდა, ქართულ ემიგრაციის მუდმივი სათეატრო საქმე გაუჩნდებოდა. ჩვენს პირობებში მყოფ საზოგადოებას ბევრი ვერ მოეთხოვება, მაგრამ, ნუ თუ შეუძლებელია შექმნა ისეთი წრის, ისეთი საზოგადოების, რომელიც თავის მუდმივი მზრუნველობის საგნად გაიხდის როგორც სათეატრო, ასევე სხვა ქართულ კულტურულ საქმებს.

სარედაქციო კოლეგია.

La gérante : **Suzanne Bertillon.**

რედაქციის მისამართი :

M^r PATARIDZÉ,
89, rue de la Republique, St Mandé (Seine).

bayherm

n95/8

ფასი 3 ლრ.

